

अंक : अप्रैल - जून - 25

रजि. नं. 31319/77

ISSN : 2320-0995

राजस्थली

भासा, साहित्य, संस्कृति अर लोक चेतना री राजस्थानी तिमाही



सम्पादक
श्याम महर्षि

प्रबन्ध सम्पादक
रवि पुरोहित

लोकचेतना री राजस्थानी तिमाही
राजस्थली


अप्रैल-जून 2025

बरस : 48

अंक : 3

पूर्णांक : 167

संपादक
श्याम महर्षि



प्रबंध संपादक
रवि पुरोहित

संपादक-मंडल
डॉ. मदन सैनी
डॉ. गजादान चारण 'शक्तिसुत'
किरण राजपुरोहित 'नितिला'
मोनिका गौड़



प्रकाशक
मरुभूमि शोध संस्थान
(राष्ट्रभाषा हिन्दी प्रचार समिति, श्रीडुंगरगढ़ 331803)

www.rbpsdungargarh.com
e-mail : rajasthalee@gmail.com



आवरण
जय प्रकाश राजपुरोहित
रेखाचित्राम
किरण राजपुरोहित 'नितिला'

सैयोग राशि

पांच साल : 1000 रिपिया, आजीवण : 2500 रिपिया, संरक्षक सदस्य : 5100 रिपिया

Phone Pay / Google Pay / Paytm : 9414416252

इण अंक में

सम्पादकीय

राजस्थानी व्यंग्य साहित्य में रचाव री जरूरत	रवि पुरोहित	3
---	-------------	---

व्यंग्य

बां रा भगवान् !	मंगत बादल	5
-----------------	-----------	---

आलेख

गोस्वामी तुलसीदासजी रै ग्रन्थां मांय लोक-सूंण	सत्यदीप	25
---	---------	----

संस्मरण

चमत्कार नै नमस्कार	शंकरसिंह राजपुरोहित	14
--------------------	---------------------	----

कहाणी

छियां-सो कीं	पूर्ण शर्मा 'पूरण'	19
पेमली	डॉ. अनिता वर्मा	27
आखरी जातरा	जीनस कंवर	32
विधवा सुहागण	पायल गुप्ता 'पहल'	37

गजल

बंदर-बांट / काँई हाल है ?	राजाराम स्वर्णकार	41
चिड़कल / होणो है, सो होणो है	पूनम चंद गोदारा	42

कविता

सटको / गोरी थारो रूप / रुतां रो मेळो	सीमा पारीक	44
--------------------------------------	------------	----

कूंत

'आस-ौलाद' में लहुक्या आगलै रचाव रा औनाण	दुलाराम सहारण	45
---	---------------	----



राजस्थानी व्यंग्य साहित्य में रचाव री जरूरत

भारतीय वाडमय मांय रचाव री न्यारी-न्यारी विधावां मांय व्यंग्य अबै अेक खास विधा रै रूप में थापित होय चुक्यो है। पैली व्यंग्य रा दरसण आपां नै लोक-साहित्य में ई होवता हा। लोक में प्रचलित कहावतां अर मुहावरां में इणां रो सै सूं बेसी बरतारो होवतो, क्यूंकै औ अेक तरै सूं बक्रोकियां होवती ही। भारतीय साहित्य में ‘वक्रोकि’ नै ईज इण विधा रो आधार मानीज्यो है। इणसूं ई व्यंग्य अर व्यंजना जैड़ा सबदां रो उद्भव होयो। आपणै अठै रा पौराणिक अर धार्मिक ग्रंथां में ई वक्रोकियां रै रूप में व्यंग्य पैलां सूं ई प्रचलित हो, पण जगत रै आधुनिक साहित्य मांय व्यंग्य विधा री सरुआत ई साहित्य री दूजी विधावां री भांत आथूणे साहित्य सूं हुयी। अनसाइक्लोपीडिया ब्रिटेनिका मांय गार्नेट लिख्यो है, “साहित्य री विधा रै रूप में व्यंग्य हास्यास्पद कै असामान्य रै पेटै हास-परिहास कै रीस दिखावण री सबल अभिव्यक्ति है। हास्यविहूणे व्यंग्य गाठ काढण ज्यूं अर साहित्य-विधाविहूणे व्यंग्य भांड री भांत हुया करै।”

इणी भांत आथूणा समालोचक मैथ्यू हागर्थ आपरै ग्रंथ ‘सटायर’ मांय इण विधा बाबत लिखै, “व्यंग्य चेतावणी देवै कै मिनख अेक खतरनाक जिनावर है, जिण मांय मूरखतापूरण काम करण री असर्व खिमता है अर जे व्यंग्य सूं इण साच रो सर्फीटवो मंडाण कर दियो जावै, तो घणो ई है। मिनख रै गौरव रो वरणाव करणो तो कवियां रो काम है।” भारत रा ख्यातनांव व्यंग्यकार प्रभाकर माचवे आपरै व्यंग्य-संग्रे ‘तेल की पकौड़ियां’ री ‘म्हारी बात’ में कैवै, “म्हारै सारू व्यंग्य कोई पोज, अंदाज, लटको कै बौद्धिक कसरत कोनी, बल्कै अेक जरूरी अस्तर है। सफाई करण सारू किणी नै तो आपरा हाथ कोझा करणा ई पड़ै। किणी न किणी नै भूंड रो ठीकरो आपरै माथै पर लेवणो ई पड़ै।”

भारत री दूजी प्रांतीय भासावां री भांत राजस्थानी में ई व्यंग्य विधा में समै-समै पर सिरजण होवतो रैयो है, फेरुं ई अबार तांई इणरी रपतार 'कछुआ चाल' ई बण्योड़ी है। राजस्थानी व्यंग्यकारां रा आंगळ्यां माथै गिणावै जिता ई नांव अर बिता ई वांग व्यंग्य-संग्रै आजलग साम्हीं आया है। आधुनिक राजस्थानी साहित्य में व्यंग्य विधा री सखरी सरुआत करणियां में नागराज शर्मा, बुद्धिप्रकाश पारीक, डॉ. मदन केवलिया, सांवर दइया अर त्रिलोक गोयल रा नांव खास रूप सूं लिया जाय सकै। इणां रै पछै रामकुमार ओझा 'बुद्धिजीवी', विनोद सोमानी 'हंस', भगवती लाल व्यास, भगवती प्रसाद चौधरी, श्याम गोइन्का, मनोहर सिंह राठौड़, हरमन चौहान, दुर्गेश, भंवरलाल भ्रमर, श्याम जांगिड़, प्रह्लाद श्रीमाली, देवकिशन राजपुरोहित, मंगत बादल, बुलाकी शर्मा, श्यामसुंदर भारती, शरद उपाध्याय, कैलासदान लाळ्स, पूरन सरमा, छत्र छाजेड़, शंकरसिंह राजपुरोहित, राजेन्द्र शर्मा 'मुसाफ़िर', पवन पहाड़िया, रामजीलाल घोड़ेला अर रामरतन लटियाल आद राजस्थानी री व्यंग्य-विधा में आपरी कलम चलाई है, पण लगोलग व्यंग्य लिखणिया लेखकां रा नांव आंगळ्यां माथै गिणावै जिता ई है। लारला साठ बरसां में ऊपरला आं व्यंग्यकारां मांय सूं घणकरा रचनाकारां रो अेक-अेक व्यंग्य-संग्रै ई साम्हीं आयो है, जदकै दो व्यंग्य-संग्रै देवणिया लेखक गिणती रा है। बीकानेर रा बुलाकी शर्मा जरुर व्यंग्य विधा में लगोलग लिखता रैया है अर इणां रा अबार लग चार व्यंग्य-संग्रै 'कवि, कविता अर घरआळी', 'इज्जत में इजाफो', 'आपां महान' अर 'तैरूंडै में किताब' आय चुक्या है। राजस्थानी में धारदार व्यंग्य लिखणिया अर इण विधा नै भारतीय साहित्य रै सैंजोड़ ऊभी करण में आगीवाण रैया सांवर दइया घणा ई व्यंग्य लिख्या, पण वांरो व्यंग्य-संग्रै वांरे सुरगवास पछै 'इक्यावन व्यंग्य' नांव सूं साम्हीं आयो।

व्यंग्य, साहित्य री वा विधा है, जिणनै पाठक घणी रुचि सूं चटखारा लेय'र पढै। राजस्थानी री पत्र-पत्रिकावां में ई कदै-कदास कोई व्यंग्य छपै, तो वो म्हरै जिसा पाठक री पैली पसंद हुया करै। राजस्थानी व्यंग्यकारां में ऊपर गिणायोड़ा नामां मांय सूं केई लेखकां री बरसां सूं कोई व्यंग्य-रचना देखण नै नीं मिल रैयी है। औड़ी बात ई नीं है कै वै उमरदराज होयग्या होवै। दाखलै सरूप शंकरसिंह राजपुरोहित रो व्यंग्य-संग्रै 'प्रित्यु रासौ' घणो चरचा में रैयो अर राजस्थानी भाषा, साहित्य एवं संस्कृति अकादमी, बीकानेर समेत मोकळी साहित्यिक संस्थावां सूं पुरस्कृत ई हुयो, पण 2017 में छप्यै इण व्यंग्य-संग्रै रै पछै वांरी अेक ई व्यंग्य-रचना किणी पत्र-पत्रिका मांय देखण नै नीं मिली। कैवण रो मतलब औ कै राजस्थानी व्यंग्य साहित्य नै रातो-मातो करण सारू इण मांय लगोलग सिरजण री जरुरत है। 'राजस्थली'रै इण अंक री पैली रचना रै रूप में वरिष्ठ साहित्यकार मंगत बादल रो व्यंग्य 'बां रा भगवान!' छापता थकां राजस्थानी व्यंग्यकारां सूं अरज है कै वै छठै-छमास ई व्यंग्य लिखै, तो वांरी रचनावां रो इण पत्रिका में घणै मान स्वागत है।

-रवि पुरोहित



मंगत बादल

बां रा भगवान्!

“बाबूजी! ओ बाबूजी! थोड़ो थम्या!” महें सोच्यो कोई मिनख किणी काम सारू म्हनै हेलो पाड़े। महें थोड़ो थम’र इन्हे-बिन्हे च्यारूं कानी तकायो, पण म्हनै कोई कोनी दिख्यो। महें सोच्यो कै म्हनै कोई बैम हुयो है। लारलै केर्ह दिनां सूं कानां में घूं-घूं-सी चालती रैवै।

घरआळी भी कैवै ही, “आजकाल थांनै कीं सुणै ई कोनी। बहरोपण उतरग्यो कार्हि? हैं...अैं...अैं...! हैं...अैं...अैं...! करता रैवै। आप रा कान ई चैक करवाल्यो!”

महें भी सोचै हो। अेकर चैक करवाणै में कार्हि हरज है? बियां तो कैवै कै इण ऊमर में कम सुणनो चोखै भागआळै मिनख रै पल्लै आवै। भगवान री उण माथै मैरबानी हुवै, क्यूंके इण औस्था में मिनख सूं घरआळं री चावनावां कीं बध जावै। बेटा-बेटी आप-आपरी मांग पूरी करणै सारू आप-आपरै ढंग सूं कोसिस कर’र बाप नाम रै जीव माथै दबाव बणावता रैवै। मिनख इण बगत औडो चक्कर-घिनी बण्यो रैवै कै कदे-कदे तो बो संन्यास तक लेणै री सोचण लाग जावै अर कदे-कदे उणनै मित्युबोध भी घेर लेवै। औ औडो बगत हुवै जद मिनख दो पाटन रै बिचाळै पूरी तरां फसियोडो हुवै अर उणनै कबीर री साखियां रा अरथाव आपीआप समझ आवण लाग जावै। आं दिनां ई उणनै खुद रै व्याह सारू औ बोध हुवै—‘कबीरा ढोल बजायके दियो काठ में पांय।’ फेरा करावण आळै पंडत अर रिस्तो करावण आळै बिचोळ्यै सारू उणरै मूँडे सूं बद-दुआवां निकलै। अब उणरै समझ में आवै कै फेरा खाय’र मिनख कीकर फेर में पडे! म्हारो विचार है कै कदे

:: ठिकाणो ::

शास्त्री कॉलोनी

रायसिंहनगर-335051

मो. 9414989707

ऐड़ी मनगत में ई जद बां चादर तो बणाली, पण आगै बाजार में गिरायक कोनी मिल्या। उण बगत 'दो पाटन के बीच में साबुत बचा न कोय' जैड़ी ओळ्डां रची हुवैली। दो-दो टाबर व्यावण आळा अर बजार में मंदी इतरी कै बेचणै सारू जिकी चादर ही जिकी 'जस की तस' धरणी पड़ी। रिसाणा हुय 'र बजार नै बाळण सारू हाथ में लांपोलेय 'र खड़ा हुयगया—कबीरा खड़ा बाजार में लिये मुराड़ा हाथ। आजकाल म्हारी मनगत कीं ऐड़ी ई चालै ही। म्हें उण आवाज नै अणसुणी करता थकां आगै चाल पड़यो। म्हरै चालतां ई ओजूं हेलो सुणीज्यो, "चाल क्यूं पड़यां बाबूजी ? थमो अकर! म्हें भी आऊं! थोड़ी देर आप साथै कीं बातां करणी है।"

म्हें ओजूं च्यारूं कानी देख्यो, पण म्हनै कोई आवतो कोनी दिख्यो। टाबरपणै में सुण्यो कै केई भटकती आतमावां भी मिनख नै हेलो मार 'र थाम लेवै अर उण में प्रवेस कर जावै। पछै उणनै खूब नाच नचावै। अबकालै म्हें भरम में भी कोनी हो। म्हें स्पस्त आवाज सुणी ही। कोई कोनी दिख्यो, तो डरणो सुभाविक हो।

दरअसल, म्हें उण दिन आधै दिन री छुट्टी लेय 'र घर कानी उंपाळो ई चाल पड़यो। बियां तो अफसरां नै छुट्टी लेणै री कदेई जरूरत ई कोनी पड़े, क्यूंके आपैरे हेठै काम करणियां नै किणी भी सरकारी काम रो कैय 'र कठैई मजै सूं जा सकै। आज पण म्हें सिर दुखणै रो बहानो लेय 'र आधै दिन री छुट्टी री दरखास धर 'र, बठै ओ.ओस. नै बताय 'र घर कानी चाल पड़यो जिकै सूं मैच देखणै में कोई भिचोळ ना पड़े। आज गाडी लेय 'र कोनी आयो। सोचै हो—आज घरां जाय 'र वन-डे क्रिकेट मैच रा मजा लेऊला। इण कारण म्हें घर कानी जाणै रो छोटो रास्तो पकड़यो। इण रास्तै में पैली मसीत अर पछै अके मिंदर पड़े। आभै सूं उण दिन लाय बरसै ही। सगळा मारग सूना पड़या। कदे-कदास कोई साइकिल या मोटरसाइकिल आळो या कोई बीजो वाहन जरूर निकलै हो, पण दिनौं—आथण व्यस्त रैवण आळी सड़क नै इण भांत खाली देखणो भी अचंभै सूं कम कोनी हो। म्हनै अकर तो लाग्यो—लारलै बरस री भांत आज भी अठै कोई हादसो तो कोनी हुयो? पण हादसो हुंवतो तो म्हनै दफ्तर में ई बेरो लाग जावतो। लारलै बरस आं दिनां में ई मसीत कनै दंगो हुयो, जिकै में तीन मिनख मास्या गया अर केई घायल हुयगया। बां रा कातिल आज तांई पकड़या भी कोनी गया। म्हें सोचै हो—इण सुनसान में कोई सिरफिरो आय 'र म्हरै पेट में छुरो मार 'र चल्यो जावै तो अठै ना कोई गवाही देवण आळो अर ना घर तांई खबर पुगावण आळो। म्हें तावळो-तावळो चालण लाग्यो तो ओजूं हेलो आयो, "इण भांत डरो ना ! अठै थंरै कोई छुरो कोनी मारै। अठै तो बापड़ा सगळा ई गरीब लोग रैवै। औ तो खुद ई मरियोड़ा जिस्या है, औ किणनै मारैला ! मारण आळा तो दो घंटां सारू बारै सूं आया अर आपरो काम कर 'र गया परा।"

अब तो म्हनै औ भी सक कोनी रैयो कै म्हारा कान गूंजै। आ तो स्पस्ट किणी मिनख री आवाज ही। म्हनै पण इन बात रो अचरज हुयो कै ओ म्हारै मन री बात कीकर कैयग्यौ? म्हैं हिम्मत कर बोल्यो, “आप कितरी देर सूं हेला पाड़यां जाय रैया हो। जिका भी हो, साम्हों क्यूं कोनी आओ? कठै सूं बोलो?”

जवाब आयो, “‘डर ना भाई! म्हैं खुदा बोलूं! थारै मायनै सूं बोलूं! म्हैं भी अेकलो हूं। कोई बात करण आळो ई कोनी। इन कारण थनै हेलो पाड़यो। म्हैं केई देर थारै साथै बगत बिताणो चावूं!’”

“आप खुदा हो तो मसीत में जाओ! बात करणी है तो किणी मुसळमान नै ढूँढो! म्हारो क्यूं बगत खराब करो? मायनै सूं कठै सूं बोलो? म्हैं ई लाध्यो थानै मजाक करण नै?”

“म्हैं मजाक कोनी करूं! साची कैवूं!”

“पण म्हैं तो हिंदू हूं अर आ बात म्हैं गरब सूं कैवूं। म्हारै कनै आय’र आप काईं करोला? थे तो बां रा भगवान हो! बां कनै ई जाओ अर आप कैवो मायनै सूं बोलूं, पण आवाज तो आपरी बारै सूं आवै।”

“मांयली आवाज थे सुणो कठै हो?” कैयां पछै अेक अट्ठास री गूंज च्यारूं कानी सूं उमड़ेर म्हारै कानां में आई। म्हैं डरयो। म्हारा पग जियां धरती रै चिपया। म्हैं भाज भी कोनी सकै हो। आ काईं बला आयगी आज! म्हैं मन में सोचै हो। बाकी च्यारूं कानी सो-कीं सामान्य दिखै हो। आवाज भी सिरफ म्हारै ई कानां में गूंजै ही।

“अरे भला मिनख! म्हैं कोई बला कोनी। साच्याणी खुदा हूं।”

बो म्हारै मन री हरेक बात रो जवाब देवै हो। म्हैं कैयो, “आप खुदा हो तो बारै क्यूं खुङ्या हो? मसीत में क्यूं कोनी जाओ? बारै कितरी गरमी पड़ै। पंछी तकात आधै में उडता कोनी दिखै अर आप खुदा हुय’र भी इन भांत तपती लाय में धक्का खावता फिरो?”

“म्हनै बठै सूं काढ दियो! और सुण! खुदा अर भगवान रै अलावा म्हारा और भी घणा ई नाम है, पण म्हैं अेक ईज हूं।” अबकालै उणरै स्वर में उदासी ही।

म्हारै झटको-सो लाग्यो, “आप साच्याणी खुदा हो तो आपनै मसीत सूं कुण काढ सकै? बा तो बणी ई आप सारू है अर जे काढ ई दिया तो बै बठै इबादत किण री करै?”

‘इबादत?’ खुदा जोर सूं हांस्यौ, “कुण करै इबादत? सगळा आप-आपरा मांग-पत्र लेय’र आवै अर इबादत रै बहानै पेस कर देवै। म्हैं औ देख-देख’र आखतो हुयग्यो। अेक दिन लोग बठै जिकी नै इबादत कैवै, करणै सारू भेड़ा हुया तो बठै किणी बम फेंक दियो। पांच लोग मरग्या अर केई घायल हुयग्या। म्हैं उण जग्यां माथै रैय’र करतो भी काई?”

सुण 'र म्हैं और डरगयो। औ मिनख जरूर कोई जादूगर है, जिको खुद तो कठैर्इ लुक्योड़े बैठ्यो है अर आपरी आवाज म्हारै ताँई पुगाय 'र म्हारो जायजो लेवै।'

उण म्हारै मन री बात पकड़ ली। बोल्यो, "आ ईज तो मिनख में कमी है कै बो किणी रो भी विस्वास कोनी करै। म्हैं भगवान हूं! तो भी म्हारो विस्वास कोनी करै! बियां जग्यां-जग्यां आपरो माथो रगड़तो फिरबो करै। सुण! म्हैं थारो कोई जायजो कोनी लेण लाग रैयो। थूं अेक दफ्तर में छोटा-सो अधिकारी है। रिस्वत आद लेय 'र काम करै। इण बातां नै दुनियां जाणै। म्हनै तो थारै सूं बस दो-च्यार बात ई करणी है।"

अब म्हैं फंसग्यो। इण तो म्हारी पूरी कुंडली खंगाल राखी है। म्हारै बारै में औ सो-कीं जाणै। म्हैं जिकी भी बात सोचूं उणरो जवाब दे देवै। इणरै बावजूद म्हैं हिम्मत कर 'र कैयो, "आप जे हिंदुआं रा भी भगवान हो तो मिंदर में जाय 'र रैवो। इतरा मिंदर और क्यां खातर बणा राख्या है। आप बठै नीं जाओला तो कुण जावैलो! आपरै भगतां सूं मिलो। बै भी तो आपरी उडीक राखै है। बानै भी तो बताओ कै भगवान अर खुदा आद म्हैं ईज हूं। आपरै कैवणै सूं स्यात आं में अक्कल आ जावै लोगां नै आपस में लड़वाय 'र तो ना मरवावै।"

अबकालै अेक गैरी अर डूब्योड़ी-सी आवाज आई, "भगत म्हारी सुणै ई कठैर्है! मिंदर सूं तो म्हनै सदियां पैली ई बारै काढ दियो। बठै अब जावै भी कुण है! कोई भगत तो जावै कोनी मंगता ई मंगता जावै। मिंदर रै बारै भी मंगता अर मांयनै भी मंगता। काँई करूं बठै जाय 'र?"

"आपनै आपरै घर सूं ई बेदखल कर दिया अर अब आप बेघर-बार रा हुय 'र सदियां सूं भटकता फिरो। आप क्यांरा भगवान हो? आप बां रै खिलाफ कोई औक्सन क्यूं कोनी लियो? आप तो सुपर पॉवर हो। अब थे ई बताओ कै म्हारै थांरी बात कीकर जचै कै आप भगवान हो?"

"आपनै कुण कैय दियो कै मिंदर, मसीत आद म्हारा घर है? औ तो मिनख ई कैवै, म्हैं तो कदे औ सोच्यो ई कोनी कै अठै भी म्हारो घर हुय सकै!"

"चलो! मिंदर या मसीत में ना सही, पण आप तो गिरजाघर में भी जा सको। बठै जाणै सूं आपनै कुण रोक सकै?"

अबकालै ओजूं हांसणै री आवाज गूंजी—“बठै ईसा आयो नीं म्हारो संदेस देणै सारू। उणनै तो क्रास माथै लटका राख्यो है। हर कठैर्इ मिनख री फितरत अेकसी है। म्हैं बठै गयो तो म्हनै कैडो बख्स देवैला!"

"म्हारै थांरी अेक बात कोनी जची।"

"कैडी बात?"

“आप कैवो कै म्हँ अेक ई हूं। पण म्हँ हिंदू हूं अर बै मुसल्मान, ईसाई, पारसी आद। तो फेर म्हारो सगळां रो भगवान अेक कोकर हुय सके ?” म्हँ सोचै हो, औ जिको खुद नै भगवान बतावै, म्हारै तरक साम्हीं हार मान लेवैलो। पण बो बोल्यो, “हे मिनख ! थारी समझ ई छोटी है। म्हँ कांई करूं ? म्हँ तो कदे हिंदू, मुसल्मान, ईसाई कोनी बणाया। म्हँ तो फगत मिनख ई बणाया अर आज भी मिनख ई बणाऊं। आगै सांचां में तो थे ढाळ्यां जाओ। इण रो म्हारै कनै कांई इलाज है ?”

“तो अब थे रैवो कठै हो ?” म्हँ हिम्मत कर पूछ ई लियो।

“आ पूरी कायनात म्हारी ई है। म्हँ तो हरेक जग्यां विराजमान हूं। जठै मरजी हुवै जा सकूं। म्हनै कोई पासपोर्ट या वीजो तो लेणो कोनी !” भगवान मजाक करी।

“सुणो भगवानजी !” म्हँ अबकाले बात बदली, “आप म्हारै में औड़े कांई देख्यो कै आप म्हारै सूं बात करणै री तेवड़ ली ? म्हँ तो आपरी निगाह में कोई चोखो मिनख ई कोनी। रिस्वतखोर अर झूठो हूं। आप सूं बात करणै सारू तो बडा-बडा रिसी-मुनी भी तरसै। आप तो म्हारै साथै इण भांत बात करो जियां म्हारा कोई दोस्त हो !” म्हँ हिम्मत कर पूछ लियो।

“जे कोई मानै तो दोस्त म्हँ सगळां रो ई हूं। रैयी बात आप सूं बात करणै री। तो आज आपरै मन में आपरी लारली जिंदगी सारू सोच 'र कर्णि पिछतावो मैसूस हुयो। इण कारण म्हँ थासूं बात करणै री सोची।”

“पिछतावो ! म्हनै तो कोई पिछतावो कोनी हुयो। म्हँ क्यारो पिछतावो करूयो ? जद म्हँ कोई गळत काम करूं ई कोनी !”

“झूठ बोलै थूं। आज उण गरीब रो काम करणै रा उण सूं थूं पांच हजार रिपिया रिस्वत रा लिया। लिया 'क कोनी ? बै अब भी थारै इण ब्रीफकेस में पड़या है।” भगवान जोर देय 'र कैयो।

सुण 'र म्हँ डरग्यो। अब बोलतो भी कांई ? जबान माथै ताळो लाग्यो।

“बो तो काम करवाय 'र गयो परो, पण थारै मन में बड़ी गिलाणी हुई। थूं दफ्तर सूं बारै आयनै उणनै ढूळ्यो भी हो। उण बगत जे बो थनै मिल जावतो तो उणनै पईसा पाण्य मोड़ देवतो। इण कारण म्हँ थारै सूं बात करी है कै थारै दिल में गरीबां सारू थोड़ी हया-दया बच्योड़ी है।”

अब तो म्हँ घणो डर्यो। म्हँ तावळै सै आपरै सगळा गाभां नै आछी भांत सूं देख्या। गाभां नै झड़काया भी। हाथ में लियोड़ ब्रीफकेस री चोखै ढंग सूं जांच करी। जरूर किणी असीडी, ईडी या विजिलेंस आळै किणी मिनख म्हारै साथै कोई जाबक नान्हो-सो माइक फिट कर राख्यो है। उणरी आवाज ई म्हनै सुणीज रैयी। अब बो माइक पण कठै फिट करियोड़े है, औ बेरो कोनी लागै। आवाज अेकदम साफ आवै। म्हँ डर सूं कांपण

लागयो कै अब घरां पूगतां ई आगे पुलिस त्यार मिलैली अर पकड़ लेवैली। इन थिती में आपै घरां मोबाइल कर 'र पूछतां भी डर लागै हो। म्हनै चककर-सो आयग्यो। पगां रै थड़ा बंधग्या। आंख्यां पथराइजगी। आखो सरीर पसेवै सूं भीजग्यो। म्हनै लागयो कै म्हैं चककर खाय 'र पडण आठो ई हो।

म्हारो औ हाल देख 'र ओजूं आवाज आई, “मिनख! डर ना। म्हैं असीडी, ईडी या विजिलैंस किणी मांय सूं कोनी। ना थारै कठई माइक फिट है। म्हैं भगवान ई हूं। बियां तो थे सगळा म्हारै सूं मिलणै सारू कठै-कठै माथो रगड़ता रैवो अर कनै आयग्यो तो सक करो। थूं जद दफ्तर सूं चाल्यो तो औ रास्तो इण कारण पकड़यो कै बिचाळै मिंदर पड़े। थूं बठै आज री रिस्वत रो दसवों हिस्सो चढाणै रो संकल्प कस्यो, पण पछै मन बदल्यो अर अब सोच राख्यो है कै आज तो पचास रिपिया ई चढास्यूं। आगै कदे ई सगळी उधार चुकता कर दूला। थूं इण भांत म्हारै सूं ई बेइमानी कर कितरा रिपिया डकार चुक्यो है। थारै कनै कोई हिसाब है?” कैय 'र भगवान जोर सूं हांस्या, “रिस्वत री काळी कमाई नै न्यायसंगत बणाणै सारू म्हारो भी दसवों हिस्सो घालदै! क्यूं! म्हनै भी पार्टनर बणा लियो, फेर भी म्हारै सूं बेइमानी?”

म्हैं कीं आस्वस्त हुयो। आ बात तो सिरफ म्हारै मन में ईज ही। म्हैं किणी नै बताई ई कोनी। औ किणी सरकारी अेजेंसी सूं तो कोनी, पण भगवान अठै इण बल्तै तावडै में क्यूं भटकै? है तो कोई और ई मामलो। म्हैं होळै-होळै चालतो-चालतो मूँडै सूं पसेवो पूँछ 'र बोल्यो, “म्हारै आपरी बात अब कीं जची है कै आप हो तो भगवान ई। आपरी आवाज तो म्हनै सुणीजै, पण आप दिखो क्यूं कोनी? आप कठै हो? आप म्हनै दिखो क्यूं कोनी? आपरी आवाज किण दिसा सूं आवै? म्हारै कीं समझ में कोनी आवै। बस औ ईज आखरी सबाल आप सूं पूछ्यो चावूं।”

बो ईज जोर रो अट्ठास—“रे मिनख! थूं म्हनै देखणो चावै ई कोनी। औ देख! म्हैं औ खड़यो थारै साम्हीं! थारै मन में! हिम्मत कर! मांयनै झांक!”

म्हैं ओजूं पसेवे सूं हळाडोब हुयग्यो। मन में झांकणै री म्हारी हिम्मत ई कोनी हुई। जे साच में भगवान साम्हीं आयग्या तो? म्हैं डरग्यो। तावळो-तावळो पग चकतो घर कानी चाल पड़यो। लारै बो ई अट्ठास पून में गूंजतो सुणीजै हो। म्हैं ओजूं पसेवै सूं हळाडोब हुयग्यो। मन में झांकणै री म्हारी हिम्मत ई कोनी हुई। जे साच में भगवान साम्हीं आयग्या तो? म्हैं डरग्यो। तावळो-तावळो पग चकतो घर कानी चाल पड़यो। लारै बो ई अट्ठास पून में गूंजतो सुणीजै हो।



आलेख



सत्यदीप

गोस्वामी तुलसीदासजी रै ग्रंथां मांय लोक-सूण

तुलसीदासजी मानस मांय जिकी पैलपोत बात आपरै पैलै ई सिलोक में मांडै बा ‘क्वचिदन्योऽपि’ नै साम्हीं लावै। बै रामचरित मानस री रचना रै रचाव में मंगव्याचरण मांय जियां रचै :

नानापुराणनिगमागमसम्मतं यद्
रामायणे निगदितं क्वचिदन्यतोऽपि ।
स्वातंः सुखाय तुलसी रघुनाथ गाथा-
भावानिवृधमतिमंजुलमातनोति ।

गोस्वामी तुलसीदास जी आपरा औ भाव खाली ‘मानस’ मांय ई नीं अडोप्या है। बां आखै चोख्याँ रै वैवार-परंपरावां रा मिनियां आपरी मोकळी पोथ्यां में रचनावां रै कसूमत तागां में पोया है। अठै आयनै ‘क्वचिदन्योऽपि’ चरूड़ हुवै। जियां कै महाभारत रै सारू कैयीजै कै, “जिको महाभारत में लिख्यो लाधै, बो आखै जगत बैवार में मिलै अर जिको महाभारत में नीं है बो आखै जगत में कठैई नीं लाधै।”

बियां ई तुलसीदासजी चौफेर फिरोळ-फिरोळ’र आपरी लिखण-पावरी में जठे-कठै जिकी भी, लोक-वैवार री अर मिनख रै कल्याण री ओपती अर सोंवती चीज लाधी, बीनै सावचेती सांभ’र धरली। कवितावली रै छंद 15 में जद गोस्वामी जी अेक पंक्ति कथै—‘लोक लखि बोलिये, पुनीत रिसी मारषि’ इणरो अरथाव ओ हुवै कै लोक-वैवार नै जाण-पिछाण’र जिकी बात बोलीजै, बा रिसी मुनियां री वाणी सिरखी पवितर हुवै। जठै गोस्वामीजी ग्यान, दरसण, भगती अर भजन रा मोकळा भाव आपरी लेखणी सूं बतावै, बठै ई बै लोक री रीत, लोक रो सुभाव अर लोक में रच्या-बस्या भावां नै भी चरूड़ कर मिनख मंगळ रा

:: ठिकाणो ::

‘अपनत्व’

वार्ड नं. 24, आडसर बास
श्रीडूंगरगढ़ (बीकानेर)

राजस्थान-331803

मो. 9460905951

दूजा पख भी साम्हळणे में कोई कोर-कसर को छोड़ै नहीं। लोक रो सुभाव हुवै—सुख री चावना अर दुख आवणे सूं पैलां उणरी जाण। इण सारू बगत सूं बाथेडो करतो मानखो बीती घटणावां सूं अर परकत री घटती घटणावां रै निचोड़ सूं सीखतो सूं-कसूं री सूझना नै केवटी है। सूं-सरोधो मिनख मन में ढूंगो बैठ्यो लाधे। गोस्वामी तुलसीदास लोकजुडाव नै आछी तरियां परखणो जाणै। जठे ताई समझ री पकड़ लाधे तो दीठाव में आवै कै आगै री कहणी-कथणी में जोतिस सास्तर आपणे सनातन संस्कारां रो अेक ठाडो हिस्सो भी कथीजै। जोतिस रै दो भागां में जठे अेक भाग अंक-जोतिस हुवै, बैठे दूजो भाग हुवै सूं-सास्तर। जोतिस में गिणत-फलित रा अठारै अर सूं-सास्तर रा दस आचारज हुया है। पण आ साव साची कै भगवान शंकर इण सूं-सास्तर रा आद सिरजणहार मानीजै। भांत-भांत रा सास्तर ग्रंथां में सूं-विचार संवार 'र राखीज्या है। जूना ग्यानी वराहमिहर आपै ग्रंथ वृहत्सहिता में सूं-सास्तर नै आछै ढंग सूं कथ्यो है, जिणें खेती, बिणज अर चेजै सारू जका सूं-कसूं हुवै, बै बताया है। आपणो देस ई नीं, लगैटगै आखी जगती आप-आपै तरीकां सूं सूं मानती अर परोटती आई है।

तुलसीदास जी भी लोक रै आं रीत-रायतां नै जूनी जुगत, पोथ्यां रै ग्यान अर गुंभारां सूं टोय 'र जोतिस-अंक अर सूं-कुसूं नै परगास्यो अर बां रै आछै बरणाव रा मोती आपरी घणकरी पोथ्यां में पोया है। तुलसीदासजी सूं-सास्तर सारू 'महाभारत' अर आदूकवि वाल्मीकिजी री 'रामायण' रो स्हारो तो लियो ई है, पण इण साथै बै लोक मांय सूं-विचार रै तागां रा सिरा काठा झाल उणां नै कविता रै संस्कार में ढाळ आपरी लेखणी सूं परगाटाया है। तुलसीदासजी रा सूं तीन तरियां निगै आवै। परकत कानी रा, जीवजंतु कानी रा, मिनख अंगां रै फड़कणै रा अर सुपना मांय दीसता दरसावां रा। मिनख रै अंगां रो फड़कणै रा भी सूं-सरोधा हुवै। जियां सीता री जनकपुरी रै बगीचै में गोरी पूजा री बगत अंग फड़कणै री बात सारू बै कथै :

जानि गोरी अनूकूल सिय हिय हरखि ना जाई कही।

पावन मंजुल मूल, बाम अंग फड़कन लगै।

(बालकांड सो. 236)

इणमें लुगाई रो डावडो अंग फड़कणो सुभ मानीज्यो है। सीताजी रै जी में सुभ भावां रो आवणो अर डावडै अंग रै फड़कणै सूं सुभ सूं हुया। इण सारू लोक में भी चालतो आयो है-

म्हारी आंख फरूकै डाईं, म्हानै बीर मिलै का साईं

जद जींवणी आंख फरूकै, आ कुबध घालसी काई॥

अयोध्या कांड रै 224वै दूहै पछै री चोपाई में आवै :

मंगल सगुन होहिं सब काहू।

फरकहिं सुखद बिलोचन बाहू॥

औ सूंण-बरताव भरत रै राम सूं मिलण जावणै री बगत रो, भरतजी री दोघड़ु
चिंता री बात रो है। सरीर रै न्यारा-न्यारा अंगां रै फड़कणै खातर गोस्वामीजी बतावै।
लोक मानता में भी लुगाई रा डावा अर मिनख रा जींवणा अंग फड़कणा सुभ हुवै तो इणसूं
उळ्ठो हुवै तो असुभ मानणै री लोक-मानता निगै आवै। भरत सूं निसाद राज जद मिलै
अर उणां रो राम सूं उमड़तो हेत देखै, तो तुलसीदासजी लिखै :

लगे होन मंगळ सगुन सुनि गुनि कहा निषादु।
मिटिहि सोच होइहि हरषु पुनि परिनाम विषादु॥

(अयो. / दो. 234)

इण सूं गोस्वामी जी बताणो चावै कै जी में हेत रा भाव हुवै तो सूंण-सरोधा सगळा
मंगळकारी ई हुवै। इण सारू सुंदरकांड में भी लंका जावती बगत री घटणा रो बरणाव
करता तुलसीदासजी लिखै :

हरषि राम तब कीन्ह पयाना। सगुन भये सुंदर सुभ नाना॥
जासु सकल मंगलमय कीती। तासु पयान सगुन यह नीती॥
प्रभु पयान जाना बैदेही। फरकि बाम अंग जनु कहि देही।
जोइ जोइ सगुन जानकीहि होई। असगुन भयहु रावनहि सोई।

अंगां सारू लोक-विचार तुलसीदासजी जिण भांत परोट्या है, बै अपणै-आप में
अनूठा है। मिनख री घड़त में पांच इंद्रियां रो घणो मैतब है, पण आ मानता भी सखरी कै
विधाता मिनख नै मैसूसणै री छठी इंद्री भी दी है, जकी आं सूंण-सरोधा नै बल देवै। काम
रो सुधार-बिगाड़ कै आगै कै घटणै रो सरोधो हुवै बां सारू साम्हीं, जींयै, डायै, आगै अर
पाछै मिलै जकां रो असर भी सूंण मानीजै। सूंण साथै जोतिस में आपरा सुख-दुख सोझणा
मिनखमन री सदीन मनस्या रैयै है।

खर डावा बिस जींवणा, गोधा दडूकै आर।
सुगनचिड़ी साम्हीं मिलै, बरसै धारोधार॥

xx xx

डावै तीतर डावै स्यार, डावै खर बोलै असराळ।
डावै घूघू घूं घूं करै तो लंका रो राज बिभीसण करै।

xx xx

आटो खाटो घी घड़ो, खुलै केसां नार।
चटकै मटको जोजरो, साम्हीं मिलै सुनार॥

xx xx

बिस बिलोरी बनायकी, मालावी हिरण्यां
औ तो सै जींवणा भला, डावै और घणां॥

◆ ◆

संस्मरण



शंकरसिंह राजपुरोहित

चमत्कार नै नमस्कार

अंगरेजी में म्हारो हाथ सरू सूं ई तंग हो। कम्पलसरी विसय होवण रै कारण आ भासा अर इणरो व्याकरण म्हारै सारू जीव रो जंजाळ बणग्यो हो। छेकड़ आंती आय 'र म्हँ इण सागै माथापच्ची करणी ई छोड दी ही। बीकानेर में कोटगेट रै मांयलै पासै आयोड़ी सरकारी सार्दुल स्कूल में अंगरेजी रा व्याख्याता ओमप्रकाशजी जोशी (राजस्थानी रा चावा-ठावा साहित्यकार श्रीलाल नथमलजी जोशी रा मोबी सपूत) रै घरै कीं महीना ट्यूशन ई करी, पण म्हरै भेजा मांय वांरै बतायोड़े ई कीं नीं बैठ रेयो हो। अेक तो इणरै सबदां री ऊंधी-सूंधी स्पेलिंगां। मतलब बीयूटी बट, सीयूटी कट, पण पीयूटी पुट। पछै 'नाइफ' अर 'नाऊ' रै आगै साइलेंट 'के' रो झमेलो। अबै आप बतावो कै 'बजट' री स्पेलिंग मांय 'यू' अर 'डी' रो काईं काम! बजट रै सागै 'पेसेंट' री स्पेलिंग ई म्हरै कदई समझ में नीं आई अर म्हँ खुद अंगरेजी वाळी इण बीमारी रो परमानेट पेसेंट बणग्यो हो। सबदां रै सागै टेंश री टेंशन अर ऊपर सूं रेपिड अर कोर्स रीडर पढण रो दोवड़े दुख। कीं भी पल्लै नीं पडण सूं म्हँ ई म्हारा कीं मितरां री भांत इणनै 'हाऊ-वाऊ' वाळी कुतिया भासा कैवण लागग्यो हो।

कम्पलसरी विसय होवण रै उपरांत दसर्वीं तो अंगरेजी में ग्रेस रै सागै पास करली ही। ग्रेस रै रूप में 'जी' रो जीकारो लागण रै कारण उण टैम म्हे यार-बेली इणनै एक्स्ट्रा एबीलिटी मानता हा। छेकड़ बारवीं में ई इण जीकारै सागै जियां-तियां नाको लागग्यो, पण बी.ओ. में कुत्ती कादै में औड़ी कळीजी कै—'खा रे कुत्ता खीर!' बियां बी.ओ. में अंगरेजी रा नंबर परसेटेज में तो कोनी

:: ठिकाणो ::
राजपुरोहित-रैवास
कृपाल भैरूं मिंदर चौक
सर्वोदय बस्ती, बीकानेर
राजस्थान-334004
मो. 7610825386

जुड़ता हा, पण कम्पलसरी विसय होवण रै कारण इणमें पास होवणो जरूरी हो। तिण माथै उणी बरस अेक औडो नियम आयो, जिणनै बांच 'र म्हारी राफां फाटगी। मोटी आफत सागै नियम औ आयो कै जे बी.ओ. (फाईनल) तांई अंगरेजी विसय में पास नीं होया तो पाढो बी.ओ. (फर्स्ट ईयर) में भरती होवणो पड़सी। मतलब कै तीनूं बरसां में किणी अेक बरस में अंगरेजी रो पेपर पास करणो ई करणो है, नींतर तीनूं बरसां री पढाई माथै पाणी फिरसी अर सगळो कात्यो पींज्यो कपास होसी।

उण बगत अंगरेजी रो औ पेपर पचास नंबरां रो होवतो हो, जिण मांय सूं अठारा नंबर लावणा जरूरी हा। म्हारै फर्स्ट ईयर में सात नंबर आया हा। साची पूछो तो औ सात नंबर ई म्हारै अलटपू में आया हा। म्हैं पाठ्य पोथ्यां रेपिड रीडर अर कोर्स रीडर रै ना तो कदैई घरै हाथ लगायो अर ना ई सार्दुल स्कूल में पढती बगत ओमप्रकाशजी जोशी रै लेक्चर माथै ई ध्यान दियो। म्हारा कान अंगरेजी सुणनो बंद-सो कर दियो हो। केई बार माटसाब रो पंजो म्हारी कनपटी अर गुद्दी में ई पड़यो। चपीड़ चिपण रो वो चिरमिराट तो थोड़ी ताळ सूं मिट जावतो पण अंगरेजी वाळे गिरगिराट तो आज ई कायम है।

परीक्षा में अंगरेजी रो पेपर हाथ में आवतां ई म्हैं सगळां सूं पैली 'अनसीन पेसिव' देखतो अर उणरै वैकल्पिक समेत वस्तुनिष्ठ सवालां रा उथळा ई अंदाजै सूं टीप देवतो। अनसीन पेसिव में जकी ई ओळ्यां सवाल सूं मेल खावती वानै ज्यूं सी त्यूं उत्तर-पुस्तिका में उतार देवतो। कोई विलोम या बहुवचन सबद ई ध्यान में आवतो तो धर देवतो। उण बगत पंदरै नंबर रो ऑब्जेक्टिव (अे बी सी डी) पेपर ई होवतो। ऑब्जेक्टिव पेपर धोळै रंग रो होवतो अर सब्जेक्टिव पीळै रंग रो। धोळो पेपर देखतां ई म्हारा ध्यान धोळा होय जावता अर पीळियो पेपर आंख्यां साम्हीं आवतां ई मूँडो पीळो पड़ जावतो। ऑब्जेक्टिव पेपर में पैली चार सवालां रै आगै कोष्ठक में म्हैं 'बी' भरतो, उणसूं आगला चार सवालां रै उथळै में 'सी' अर पछै सगळां में आडैकट 'डी'। 'अे' किणी सवाल रै उथळै में नीं भरतो। म्हारो औ निजू अनुभव हो कै सही उत्तर 'अे' तो भूल्यो-चूक्यो ई होवै। इण भांत री कारस्तानी सूं ऑब्जेक्टिव पेपर में म्हैं पंदरै मांय सूं चार-पांच नंबर लेय पड़तो अर बाकी रा चार-पांच नंबर म्हनै 'अनसीन पेसिव' दिराय देवतो। फर्स्ट ईयर में सात नंबर अर सैकेंड ईयर में पचास मांय सूं नौ नंबर आया। पण पास होवण सारू तो अठारा नंबर लावणा जरूरी हा। फाईनल रो परिणाम तो अंगरेजी रो पेपर आंख्यां आगै आवतां ई साम्हीं पड़यो हो। औ तय होयग्यो हो कै इण जीवण में तो किणी सूरत में बी.ओ. पास नीं कर सकूं।

खैर! होणी नै कुण टाळै! होई सोई राम रचि राखा। जिण भांत लारलै दो साल अंगरेजी रो पेपर दियो, उणी भांत तीजै साल ई परीक्षा देय 'र मूँडो लटकायां घरै आयग्यो। सोरा-दोरा दूजा पेपर ई पार पटक्या। जून महीनै में जद अखबार में बी.ओ. फाईनल रो

रिजल्ट आयो तो बेमन सूं देखणो ई हो । म्हें अर म्हारै डोळ रा ई म्हारा कीं बेली रिजल्ट सप्लीमेंटरी सूं देखणो सरू करता । जद थर्ड अर सैकंड डिविजन में ई रोल नंबर नीं लाधतो तो फस्ट डिविजन रो कॉलम देखण री जरूरत ई नीं पडती । म्हें साव हतआस होय 'र माथो पकड़ 'र बैठग्यो । बात फगत फाईनल रै रिजल्ट री नीं ही । अबै तो पाछो फस्ट ईयर में एडमिशन लेवण रो मोटो दुख हो । कैवे कै जद मिनख री आंख्यां में अंधारे रै कारण तिरवाळा आवण लागै तो बीच-बिचाळै अेकर चांनणो जरूर होवै । दोयेक घंटा पछै म्हारो अेक बाळगोठियो सहपाठी आय 'र बतायो कै थारो रिजल्ट रोकीज्यो है, म्हें खुद म्हारी आंख्यां सूं थारा रोल नंबर देख्या है । जिगरी भायलै री बात सुण 'र पाछो अखबार देखण रो जिगरो जाग्यो अर म्हें अचंभै सूं 'रिजल्ट विध हेल्द' में म्हारा रोल नंबर देख्या । अेकरको तो म्हनै भरोसो ई नीं होयो कै इयां कियां होय सकै ? खैर, हरि करै सो खरी !

जुलाई रो महीनो बीतण मत्तै हो । कॉलेजां में नंवा एडमिशन सरू होयां नै महीनो भर होयग्यो हो । म्हारो रोक्योडो रिजल्ट अजै तांई आयो कोनी हो । जद अगस्त रै पैलै हफ्तै तांई रिजल्ट नीं आयो तो म्हें दाता देवकिशनजी राजपुरोहित (चंपा खेड़ी) री शरण में गयो । बियां तो म्हें दो-चार दिनां में उणां रा दरसण-लाभ लेवतो ईज हो । उण बगत बीकानेर सूं ईज वांरो 'दैनिक प्रांतदूत' नांव सूं अखबार छपतो हो अर राजपुरोहित जी उण अखबार रा प्रधान संपादक हा । म्हें दो-चार दिनां सूं अमूमन वांरी चौतीणा कुवा रै लारै आयोडी प्रेस में जावतो हो । उण दिन म्हें सिंझ्या री बगत वांरी प्रेस गयो अर घणै सकै रै सागै म्हारै रिजल्ट बाबत उणां सूं बात करी । म्हें वांनै बतायो कै म्हारै बी.ओ. (फाईनल) रो रिजल्ट रोक्योडो है । आगलो शिक्षा-सत्र सरू हुयां नै सवा महीनो होयग्यो है, पण म्हारो रिजल्ट अजै तांई नीं आयो ।

दाता म्हारै माथै रीसां बळता कैयो कै आ बात थूं म्हनै इत्ता दिन क्यूं नीं बताई ? पछै कैयो, “काल दिनूंगै दस-इग्यारै बजी आय जाईजै ?”

म्हें दूजै दिन दस बजतां ई दैनिक प्रांतदूत रै दफ्तर पूगग्यो हो । उण बगत दाता देवकिशनजी री उमर पैताळीसेक बरसां री हुवैला अर बीकानेर री पत्रकारिता में वांरो दबदबो हो । इणसूं पैलां वै उण बगत अजमेर सूं छपण वालै ख्यातनांव अखबार दैनिक नवज्योति रा बीकानेर में 'ब्यूरो चीफ' रैया । दाता राजस्थान विधानसभा सूं छायोडी अेक डायरी मांय सूं अजमेर विश्वविद्यालय रै वी.सी. (वाईस चांसलर) रा नंबर लिया अर दैनिक प्रांतदूत दफ्तर रै टेलीफोन सूं सीधो वी.सी. नै फोन खड़काय दियो । उण बगत वी.सी. कोई मेडम हा । वांरो पी.ओ. फोन रिसीव करियो । दाता आपरो परिचै बीकानेर सूं दैनिक प्रांतदूत रै संपादक रै रूप में दियो तो पी.ओ. तुरंत मेडम सूं बात करवाई । दाता वी.सी. मेडम नै पूरी डिटेल दी, तो मेडम विश्वविद्यालय में पूछताछ करूंयां पछै जबाब

देवण रो कैयो । दोयेक घंटा पछै दाता तो फेरूं फोन मिलायो । वी.सी. मेडम जाणे उणां रै फोन नै ईज उडीकै ही । म्हनै वांरी आपसरी री बात तो नीं सुणीजै ही, पण बातचीत में जद गरमागरमी होई अर दाता कीं रीसां बळता जोर सूं बोल्या, “... तो मेडम! एक बात बताइए किका दंड फकीर क्यों भुगतै?” इतो सुणतां ई वीसी मेडम फोन काट दियो । दाता रै साम्हीं बैठ्यो म्हें ई बघरायग्यो हो ।

फोन कठ्यां पछै दाता होळै-होळै कीं ‘नॉर्मल’ हुया अर म्हनै नैष्ठे सूं बतायो, “थारी अंगरेजी विसय री कोपी विश्वविद्यालय स्तर माथी कठैर्ई गमगी है । खाली थारी कोपी ई नीं, और ई कीं विद्यार्थ्यां री कोप्यां गायब है । कोपी मिल्यां ई रिजल्ट घोसित करीजसी । पण थूं चिंता मत कर । काल फेरूं वी.सी. मेडम सूं बात करूंला, थारै साम्हीं ई करूंला । थूं काल दिनौं टैमसर आय जाईजै!” दाता नै ध्यान नीं रैयो कै आगलै दिन अतीदवार है । विश्वविद्यालय में छुट्टी ही । म्हें प्रेस गयो अर बेरंग आयग्यो । बियां ई म्हरै कनै अबार इण टाळ कोई काम कोनी हो । म्हें सोमवार नै फेरूं दाता री शरण में पूगग्यो । पूगणो ई हो । म्हरै भविस रो सवाल हो । दाता लगैटगै साढी इग्यारै बज्यां फेरूं अजमेर विश्वविद्यालय रै वी.सी. चेंबर में फोन मिलायो । पी.अे. उठायो । वै बतायो कै मेडम थोडी देर पछै बात करैला । दाता अबै इण मामलै नै आपो ‘प्रेस्टिज पाइंट’ बणाय लियो हो । वै तो आधेक घंटै सूं फेरूं फोन खड़कायो । अबकाळै वी.सी. मेडम दाता देवकिशन जी राजपुरोहित नै जकी बात बताई अर इण दरम्यांन उणां रै चेहरै माथै जका राजी-बाजी रा भाव देख्या तो म्हारा ई कान खड़ा होयग्या । लगैटगै दो-तीन मिनट री उण बंतळ रो सार औ हो कै विद्यार्थी शंकरसिंह राजपुरोहित री अंगरेजी री कोपी (उत्तर-पुस्तिका) मिलगी है अर पूर्णाक पचास मांय सूं तियांझीस नंबर आया है । वी.सी. मेडम दूजा सगळा विसयां रा नंबर ई दाता नै फोन माथै ईज बताया, जिणां नै वै नोट करता गया अर मार्क-शीट रजिस्टर्ड डाक सूं हफ्तै भर में पूण री बात कैयी । फोन कठ्यां पछै दाता रै मुळकै मूँडै सूं आ बात सुण’र म्हारी बाढ़ां खिलगी । म्हें आज ताईं अचंभै मांय हूं कै सौ मांय सूं अंगरेजी विसय में 29 नंबर हासल कर’र ग्रेस सूं पास होवणियै टंटाटेर रै पचास मांय सूं 43 नंबर कियां आयग्या । दरअसल उण साल हिंदी विसय में म्हरै पचास मांय सूं बयांझीस नंबर आया हा, पण म्हरै जीव रो जंजाळ बण्योड़ी अंगरेजी अनिवार्य में उणसूं ई अेक नंबर बेसी आवणो म्हरै सारू किणी चमत्कार सूं कम नीं हो ।

इण रिजल्ट सूं चारेक महीनां पैली अखबार में अेक ‘बॉक्स खबर’ जरूर पढी ही कै हरियाणे री सींव लागतै राजस्थान रै बगड़ कस्बै मांय अजमेर विश्वविद्यालय री उत्तर-पुस्तिकावां री जांच करती बगत उणां मांय सूं कीं उत्तर-पुस्तिकावां अेक भैंस आपै उदरस्थ करली ही । मतलब वा भैंस कोपियां रो आपै मूँडै सूं गबळको कर लियो हो ।

दरअसल, इन अणहोणी घटणा में होयो इयां कै कोप्यां जांचणिया लेक्चरूर साब बंडल बारै टेबल माथै ई छोड'र घर में चाय लेवण सारू चल्या गया हा अर पाढा बाखळ में बावङ्या जितै कीं कोप्यां जांचण रो काम वांरी दुधारू भैंस कर लियो हो। भरोसै री भैंस पाडा लावै, पण म्हारै औ बैम आज ताँई बण्योड़े है कै काँई कोप्यां रो वो बंडल अंगरेजी रो हो? कठैई म्हारी अंगरेजी री कोपी तो उण भैंस माता रै भेट नीं चढगी? जे साच्याणी इयां होयो, तो वा भैंस म्हारै सारू साख्यात देवी ई समझो। खैर कीं होवो, पण इतै बडै चमत्कार नै तो नमस्कार करणो ई पडै। अठै दाता देवकिशनजी राजपुरोहित नै बारंबार निवण करणो ई कियां बिसराईजै, जिणां रै अखबार रूपी चक्कै अर विश्वविद्यालय रै धरम-धक्कै सूं बी.ओ. फाईनल री आ दुरगम घाटी पार पडगी। औ पडाव पार करियां पछै ईज आगै जाय'र मातृभासा राजस्थानी में अम.ओ. पैलै दरजै सूं पास करण रो सौभाग मिल्यो अर वो ई स्वयंपाठी छात्र रै रूप में सोनै रै तुमगै सागै, जिणनै अंगरेजी में 'गोल्ड मेडल' कैवै।



कहाणी



पूर्ण शर्मा 'पूरण'

छियां-सो कीं

सामली ताई ई कैवता सगळा। ठाह नीं क्यूं? अलबत्त बांगे घर म्हालै घर रै तो साम्हीं हो, पण सगळे बास रै तो साम्हीं कोनी हो? फेर ई ताई पूरे बास री सांमली ताई ही अर सावळ कैवूं तो बास री ई नीं पूरे गांव री सांमली ताई ही। बियां सांमली ताई नांव कोनी हो बीं रो, बो तो बस बैक हो। नांव तो ताऊ रो ई औक-बैक हो। लोग 'सुल्तान' कैवता-कैवता ठाह नीं काईं-काईं कैय देवता, पण ताई नै सांमली ताई ई कैवता सगळा। आ कोनी कै ताई नै ठाह कोनी हो कै लोग बीं खातर काईं कैवै, पण ठाह हुवो भलाई, ताई रै कोई फरक कोनी हो। ताई रै तो ई बात रो भी फरक कोनी हो कै सांमलो बात काईं कैय रैयो है। समूची बात ताई रै कदेई पल्लै ई कोनी पडती... बस ताई नै तो साम्हीं सूं कोई अेक टप्पे सुणीजतो अर ताई सरू...। इन्है-बिन्है अर ठाह नीं किन्है-किन्है री बातां हुंवती ताई कनै। बातां ई बातां। बियांस ताई नै सावळ सूं टप्पे सुणतो ई कठै हो? दिल्ली ऊंचो सुणती। ऊंचो सुणतो पण ताई नै तो बस बात रो नुगो चाईजै हो। नुगो हाथ लाग्यो नीं अर ताई गरणेट चढायो नीं। हाथ सूं हाथ थामती ताई री बातां मतैई आगै सूं आगै बध्यां जावती... ताई खुद भी। बातां आगै अर ताई लारै। जाणै भाजती भैंस लारै लाठी लेय भाजती हुवै। ऊपरसांसा। हम्बै... बातां करती ताई ऊपरसांसां हुय जावती। केरई ताळ ताई तो ताई सप-सप करबो करती पछै उतावळी ई जोर चढ जावती। ताई रो सुर ऊंचो हो। स्यात ताई नै ऊंचो सुणतो हो, ई खातर। कठैई भीतर औ भाव हुंवतो हुयसी कै सांमलै नै ई ऊंचो सुणीजै...। कुण जाणै? ताई तो कदेई बतायो कोनी।

:: ठिकाणो ::
बाईं नं. 5, रामगढ़
तहसील-नोहर
जिला-हनुमानगढ़
राजस्थान-335504
मो. 9828763953

बास रै सगळा टाबरां रो लाड करती ताई। सैंग रा सैंग ताईआवी बाखळ मांय ई गदमचक्का करता... पूरै दिन पण ताई नाक सळ कोनी घालती। टोरो लागतो तो गिंडी बाखळ नै छेकती आंगणे ताई जा पूगती तो रोटी पोवती ताई बिचाळै ई ऊभी हुंवती अर गिंडी नै ओजूं बाखळ कानी रुड़ा देवती। इयां करतां ताई री आंख्यां मांय भी कीं रुड़ा जावतो अचाणचक। माटी री परात मांय ओसणेडो आटो करडो हुय जावतो, पण ताई री कचकोळ्यां-सी आंख्यां मांय रुड़ती गिंडी-सो बो मोडै ताई रुड़बो करतो।

गिंडी किसी अेकर आवती... ओजूं उछळ आवती, पण ताई रै कोई फरक कोनी पड़तो। गिंडी उछळती तो कदे रसोई री छात माथै जा पड़ती तो कदे न्हावणघर मांय। ताई न्हावणघर मांय न्हावती हुंवती, पण “अे रे... ल्यो...” ताई हाथूंहाथ गिंडी नै बारै उछाळ देवती। टाबर भी काई करै? और खेल ई तो कोनी हा बां कनै। घूतो-गिंडी अर मारदडी... का पछै लाला-लित्तर अर लुकमिचणी... बस, औ ई खेल हा। क्रिकेट-कारकेट बां दिनां हा ई कोनी। कबड्डी तो हुंवती, पण छोटा टाबर किस्या कबड्डी खेलै हा। अेक ई अेक खेल सूं खेलता धाप जावता तो कदे-कदे दो खोरियां रा ठीया जचावता अर पाणो-गिंडी खेलण लागता। हां, खेलता बढै ई। पाणे-गिंडी खातर भी कठै जावै? खेलणै री जिग्यां तो बढै ई ही। ताई आळै घर साम्हीं गळी मांय अर का ताईआवी बाखळ मांय। बाखळ चौडी तो कोनी ही, पण लांबी खूब ही। चीकणै ताल बरगी जमेडी न्यारी। छुट्टी आळै दिन तो पूरै दिन खेलबो करता टाबर। टाबरां नै खेलतां देख'र कोई बडो भी आय जावतो बाखळ मांय। टाबर री दादी का पछै आपै टाबर नै बुलावणै खातर कोई बीनणी। ताई रा तो आगडा ठाठ हुय जावता।

“छोड बात थूं...।” ताई आपै तकिया कलाम सूं सरू हुंवती तो पूरी री पूरी रामायण सुणा देवती सांमलै नै। केई दिनां रो भेठो हुयेडो अलेवण अेक समचै ई सूप देवती आगलै नै।

“ताई रै पेट मांय ब्होत बात है।”

“पण खटावै तो कोनी।”

“ताई साथै तो बगू नाई आवी हुय रैयी है रांडो...।”

अर ताई रै परपूठ लुगाइयां दे-दे ताळी हांसबो करती।

ताई री आंगणबाई भीतर नै ही। गळी माथै तो घर रो बारणो ई खुलतो बस। बारणे सूं लेय पूरै अेक प्लाट लांबी नाळ-सी बाखळ ही। बाखळ रै पछै घर हो... आंगणो हो। आंगणे सूं चिपतो ई हो छपरो। छपरो मतलब... ताऊ अर ताई री बैठक। बैठक कैय देवो चायै खेत। असल मांय छपरो बांरो खेत ई हो। खेत जको पेट भरै। छपरो ई पेट भरतो बांरो। ताऊ बोरा बणावतो हो। जट रा बोरा। बां दिनां ऊंट री जट रा बोरा घणा चलत मांय हुंवता। बियांस बकरी री जट रा भी हा, पण अठै सोतर मांय ऊंट बेसी हा, घोनो घट।

घोनो बियां ई जाटू धन कोनी मानीजै। जाटू तो भैत ई हुवै। म्हैं अलबत्त आं बातां नै जाणतो कोनी, पण जद छपैर मांय बैठ्यो हुंवतो तो खड्डी री खट-खट बिचाळै ताऊ घणी सारी बातां बतायां जावतो। आपरा कंधोळा ऊंचाय-ऊंचाय 'र ताऊ बोरो बणतो जावतो अर लगोलग म्हरै सूं बतवावतो जावतो। ताऊ बियां तो घट ई बोलतो, पण जद खड्डी माथै हुंवतो तो जाणै ताऊ रै मूँडे सूं बोल मर्तैई झरबो करता। घणी सारी बातां ताऊ मर्तैई बतायबो करतो। कीं म्हैं ई पूछबो करतो। ताणै मांय पेटै आळी पिंडी घालतां ताऊ री फुरती देखबो करतो। ताऊ नै पुरसल सुणतो तो कोनी, पण म्हरै हाथ अर होठां री हरकत सूं अंदाजो लगावतो ताऊ।

“ औं पसवाड़लै पासै थे मोटी तांत रो तागो कियां घाल्यो है ताऊ ? ”

सरड़-सरड़ बधतै बोरै रै म्हैं हाथ लगावतो तो ताऊ समझ जावतो अर बतावतो, “ आ कानी है लार्डी। कानी जित्ती मोटी हुवै, बोरो बित्तो ई तकड़े बणै। ”

ताऊ आपरी मुट्ठी भींचतो अर बात साथै सैन सूं समझावतो तो लागतो जाणै जिनगी रो कोई ऊंडो फलसफो समझावतो हुवै। ताऊ जद बात करतो तो म्हैं बीं री मुहाळ कानी देखतो। सांयत अर धीरू मुहाळ। किणई दरवेस दाईं।

ताऊ-ताई रै ओक बेटो हो अर दो बेट्यां ही। घर भस्यो-भस्यो सो हो। बेटो अमरो म्हरै सूं पांच-छह साल बडो ई हो। रिस्तो आयो तो परणा दियो। घरां बीनणी आयी अर घर कीं और भरग्यो। साल खंड घरां बीनणी रैयी इत्तै तो ताई रै पांख लागी रैयी। बीनणी आगै मसीन बणी रैवती ताई। सगळो काम आप करती। बीनणी नै हाथ ई को लगावण देवती। गुणमुण-गुणमुण करती ताई पूरे दिन खटबो करती। बीनणी साळ मांय ढोलियै माथै सूती रैवती अर ताई आंगणै मांय काम लागी रैवती, पण ताई री आंख्यां मांय थकेलै रो ओक तासू तकात कोनी हुंवतो। कारो करता बास रा टाकर बारै बाखळ मांय गिंडी रुड़बो करता अर... अर ताई री आंख्यां मांय उन रो गिंडियो रुड़बो करतो।

बीनणी अर अमरो उडीकै ई हा जाणै। साल ई कोनी नीसरण दियो। कई दिन तो बां आंटा-बळेडा-सा लिया, पण छेकड़ न्यारपणो साध लियो। ताई री कचकोळ्यां-सी आंख्यां मांय रुड़तो उन रो गिंडियो अचाणकर ई उधड़यो। पछै तो उधड़ेड़े गिंडियो लेयां फिरबो करती ताई... चुपचाप। बियांस बोलती बगती तो बोलती बगती, पण दुनिया-इयान री बातां बिचाळै ओचट ओक भिचकीं-सी लागती अर ठीक ई बगत ई ताई रै अळूळ्या-पळूळ्या चैरै कानी कोई देखे तो देख सकै... तार-तार हुयेड़ो... सो-कीं।

बेटो-बीनणी गया तो ताई रै भीतर जाणै कित्तो कीं रीतग्यो हो, पण फेर ई घर भस्यो-भस्यो सो ई हो। आंगणै मांय बेटी हुवै इत्तै घर रै ठाड हुवै अर ताई रै आंगणै तो दो-दो बेट्यां ही अजै।

“बेटी हुवै इत्तै सो-कीं है...।” मन मांय सोचती ताई ठाह नीं क्यूकर-सी हुयगी ही बीं दिन, जद बेटो-बीनणी आपरो सामान लदै हा। बियां तो बै किस्या न्यारी भांत न्यारा हुवै हा। औरां रै तरियां ई केर्ई-केर्ई दिनां ताई ओला-छाना करता रैया हा दोनूं। कदे कीं ऊळावो लेंवता अर कदे कीं।

“आज आसंग कोनी म्हारी, खेत कोनी जावू।”

“आज पेट दुखै।”

ऊळावो ना हुवै तो ई, बेटै-बीनणी री फूलेडी निजर छानी कोनी ही ताई सूं अर फेर लुगाई रा फफड़ा तो लुगाई जाणै ई है? हां, ताऊ नै कीं ख्यांत कोनी हो, पण ताई तो केर्ई दिनां सूं देखै ही। भातै ताई जाण'र पङ्घै रैवणै रो साफ मतलब समझै ही ताई। बीनणी कारू ही का नीं ही, सावळ सूं ताई जाण ई कोनी सकी नीं, पण बीं रो आपरो जामेडो तो छानो कोनी हो ताई सूं। ब्याह हुयां पछै क्यूं, पैलां किसी फली फोड़तो हो बो। पङ्घै रैवतो पलगोड। सरू-सरू मांय तो ताई कैयबो करती, पण कैयै रो कीं असर कोनी हुंवतो। ताई री कचकोळ्यां-सी आंछां मांय ओक छियां-सी तिर आवती अर पूठी गम जावती। पूरो गाम आवतो बोरा बणावण नै... “सुल्तान...ऽ... घरां हो काई?” ताई माची माथै सूत्यै अमरै नै खड़बड़ावती, “जा थारै बापू नै कोई हेलो मारै।” आळसेडो अमरो “आं...ऊं...ऽ...” करतो इत्ती ताळ मांय तो हेलो मारणियो ओजूं हेलो मार देवतो, “सुल्तान... ओ सुल्तान...?” हेलो ओजूं सुणतो तो जाणै ताई रै भीतर कठैर्ई अणजाण घट्टां मांय गूंजतो, “अमरा... ओ अमरा?” पण अमरै नै कुण हेलो मारै, ताई सूं किस्यो छानो हो ना। खेती ही कोनी अर बोरां रै बो लागै कोनी। स्कूल रै तो साम्हीकर ई कोनी टिपेडो। काम बिना कुण लेवै नाम? पूरो गाम आवै घरां, पण अमरै भलां ई तो कुण ई कोनी आवै। हेलां माथै हेला आवै तो छेकड ताई नै ई किंवाड़ खोलण खातर जावणो पडै। कदे-कदे तो ताई सोचै कै पङ्घै रैवण देवूं नीं खुल्ला... पण खुल्ला खटावै तो कोनी। टाबर खेलै इत्तै तो भलाई, पण दुपारी मांय डांगर तो सेकबो करै... ढक्कै ताई।

बैं-बैं करण आळी ताई पूरे गाम मांय बाजींती ही, पण घरां कीं कोनी बोलती। बोली तो बीं दिन ई कोनी ताई जद बीनणी आपरो सामान टाळ-टाळ नै गाडै मांय घालै ही। ताई कानी देखबो करी, कीं कोनी कैयो बीनणी नै। बीनणी नै काई कैवै ही, आज तो ताऊ साथै ई सप-सप कोनी करी। घामघूम-सी छपै मांय बैठी रैयी, ताऊ कनै। अमरो अर बीनणी चुग-चुग'र सामान टाळै हा। दायजै मांय आयेडो अर घरां बपरायेडो, दोनूं ई। आपी टाळै हा अर आपी घालै हा। ताई टुगर-टुगर देखै ही, अबोली। अलबत्त दोनूं भैणा ई लाग रैयी ही, भाभी नै टाळेडो सामान झलावै ही।

पिकअप टुरण नै त्यार ही। अमरो जावतो-जावतो पूठो मुङ्घो अर छपै मांय आयो। अमरै नै आवतो देख ताऊ अडूं सूं ऊभो हुयो अर बेटै रै सिर माथै हाथ धस्यो।

पिछांसी आंख्यां मांय सील उतर आयी। अमरो मसीन ताई रै पगां लाग्यो अर बिना कीं बतायां ई पिकअप कानी चाल पड्यो। बीनणी नै केई ताळ हुयगी ही पिकअप मांय चढी नै। ताई इकलंग बीनणी कानी जोवै ही, पण बीनणी अेकर ई कानी कोनी देख्यो।

“म्हैं तो इस्यो कीं कैयो ई कोनी आज ताई ?” ताई मनोमन सोचै ही।

“थूं कोनी कैयो जद ई तो बात है।”

“... ... ?”

“थूं आपरै मूँडै सूं तो न्यारो हुवण री कैवण सूं रैयी, पछै काई उडीकै ही बीनणी ? जको कीं करणो हो, बो तो आपोआप ई करणो हो, कर लियो।”

“पण म्हैं तो अलीफ री बे ई कोनी कैयी... हथेल्यां मांय थुकावै ही ?”

“न्यारो हुवण रो ओ अेक ई कारण हुवै ना ?”

“... ... ?”

“दो-दो बेट्यां कंवळै लागी खडी है... जाणै कोनी थूं ?”

पिकअप कदेन री ई गयी परी, पण ताई सोपै ताई अछोचती रैयी... अछोचती रैयी। ताऊ नै तो खेर काई कैवै ही ताई, सोच्यो, “आं रो मन क्यूं काचो करूं... ।”

अमरो गाम रै अगूणै पासै प्लाटां मांय जाय 'र बस्यो हो। सरू-सरू मांय तो बीनणी रै भकायां कोनी आयो, पण पछै आवण लाग्यो। पछै रै दिनां मांय कदे-कदास बीनणी भी आय जावती। ताई घरां आयेडी बीनणी नै आसीस देवती। थोडी-ब्होत इन्है-बिन्है री बतावती, पण खास बढका कोनी पाडती। ऊन रै उधडेडै गिंडियै रो कोई तार इयां ई आंख्यां साम्हिं तिसळ आवतो। पूछण रो जी करतो, पण पूछीजतो कोनी। पूछै किणनै ? बीनणी मरोड मांय आवती अर मरोड मांय ई पूठी बग जावती। न्यारो हुयां पछै गामै साल खंड ई और रैयो हुयसी अमरो, पछै तो बीनणी आपरै पीहर मांय खेंच लेयगी। अठे किसी जोळ ही। खेती तो तीजियै ई बाहणी ही, बठै बाहली।

बगत बीत्यां दोनूं बेटियां परणाईजी। ब्याह मांय बेटो आयो हो अर बीनणी ई। अजै सूनी गोदियां ही। ताई आंटो लेय 'र पूछ्यो तो सरी, पण बीनणी कीं कोनी बतायो। आठ-दस दिन रैया दोनूं अर गया परा। हुयग्यो फरज पूरो। बेटो-बीनणी गया अर बेटियां ई गयी। बेटियां आप-आपरै घरबार री हुयगी अर घरां अब ताऊ-ताई हा... का छपरो हो।

पाकती ऊमर ताऊ नै कीं और ई बोलो कर दियो हो... अबोलो भी। ताऊ अबै लगटगै चुप ई रैवतो अर और तो और, घर सूं नीसरणो ई छोड दियो हो ताऊ। कोई बोरै खातर घरां आयेडो माणस कीं बतावतो बा थोडी ब्होत पल्लै पडती ताऊ रै, बाकी तो ताऊ आपोआप ई जचा लेवतो, मांय ई मांय। बस इत्ती-सी दुनिया रैयी ही ताऊ री। हां, ताई री दुनिया अबै ई छपरै सूं बारै ही। बास मांय अर बास सूं ई आगै फळसै ताई। गाय री सार-संभाळ अर रसोई रो काम साम्यां पछै ताई बेहली ई हुंवती। जावती-जावती अेकर

छपरै मांय पग-मोड़े सो करती अर पछैं बारै नीसर जावती। कदेई म्हारलै घरां अर कदे किणई और रै घरां। बास घणो ई ठाडो हो अर ताई खातर तो घणी ई जग्यां ही। दुपारी री बेल्ह मांय “अरे... छोड बात थूं” रो रस लेवण खातर बास री सगळी लुगाइयां उडीकबो करती ताई नै।

ताई कनै ब्होत बातां ही, ब्होत समाचार हा। म्हैं सोचतो—इत्ती सारी बातां, इत्ता सारा समाचार कठै जचायां राखै ताई। पूरो-सूरो सुणै तो है ई कोनी! जाबक ऊंचो सुणै। ताऊ सूं तो कीं सावळ सुणै, पण है तो बोळी ई? ताऊ ई बोळो अर ताई ई बोळी। दोनूं बोळा। बोळो पूछै बोळी नै... काईं रांधां...? छपरै मांय ताऊ-ताई नै बतवावता देखैर म्हैं मन ई मन सोचतो अर मुळक पड़तो। पछैं सरम आवती आपरै सोचेडै माथै... औडो नीं सोचणो चाईजै।

हेत हो ताऊ अर ताई रो। दोनूं बिना बोल्यां ई पूरो दिन अेक साथै बैठ्या टिपा देवता। सगळै दिन ‘बड़-बड़’ करती ताई रै ई काईं हुंवतो कदे-कदे ठाह नीं। घर सूं बारै ई कोनी नीसरती। पूरै दिन ताऊ कनै बैठी रैवती। अलाह-सी ताऊ री मुहाळ कानी तकबो करती... तकबो करती। ठाह नीं काईं हुंवतो बीं बगत ताई री आंख्यां मांय... जाणै समूळो वजूद अबै आंख्यां मांय ई हुंवतो ताई रो। कदे-कदे लागतो जाणै कोई छियां-सी तिरबो करै ताई री आंख्यां मांय। कंवळी-सी... अर झीणी-सी। ...पण किण री? अमरै री... का... का...?

कातेडी जट नै पिंडी माथै अटेरती ताई अेकर-अेकर ताऊ रै मूळे कानी जोवती अर पछै ओजूं आपरै काम मांय लाग जावती। ताऊ री आंगळ्यां अर खोवा नाचबो करता... ताणै अर पेटै री देही माथै। कदे-कदे इयां हुंवतो कै ताऊ कोई अेक टप्पो कैय देवतो अर पछै ताई बीं नै साप्ह लेंवती। अेक सूं अेक जुड़ती ठाह नीं कित्ती सारी बातां सुणा देवती ताऊ नै। होळै-होळै। ताऊ रै पल्लै कीं कोनी पड़तो, पण ताई तो आपरो आफरो उतार लेंवती। रही-सही कसर बारै काढ लेंवती।

खुल्ली बोलती ताई। अलबत्त सरू तो सप-सप सूं ई करती, पण पछै गेड़ चढ जावती... पांचवैं सुर ताई। पण औं पांचबो सुर लोगां खातर ई हो, ताऊ खातर नीं। ताऊ साथै बतवावती ताई न्यारी हुंवती। गुरबत करती आ ताई “अरे... छोड बात थूं” कैवती सांमली ताई सूं अळगी हुंवती। गोडा अर मोडा नचावतो ताऊ अर सप-सप करती ताई... कोई देखणियो, देखबो करो भलाई। कदे-कदे बारै री उतावळ हुंवती तो ताऊ रै हाथां रो कमाल देखण आळो हुंवतो। पिंडी सरकावता थकां जित्ती जोर सूं ताणो उछळतो बीं सूं कित्ताई जोर सूं ताऊ रा कंधोळा उछळता अर पेटै री पिंडी झट ई पासै सूं बीं पासै जा नीसरती। आंख फरूकै इत्ती ताळ मांय तो पिंडी ओजूं ताणै री ऊपरली ताण छोड़र हेठै री ताण मांयकर सागी ठौड़ आ पूगती। ठीक ई बगत ई ताई सप-सप करती आपरी कोई

अेक बात पूरी करती अर बोरे कानी माथै जोर सूं हत्थो मारतो ताऊ मुळक पड़तो । कदे-कदे ताऊ आपरा हाथ थामनै कीं गौर सूं सुणतो ।

सुणतो ?

हैं...हैं...हैं... और काँई कैय सकां ? ताऊ नै तो कोनी सुणतो, पण ताऊ तो सुणतो ई हो ।

बोरे सूं कोई हेलो पाड़तो, “सुल्तान...सुल्तान ११...”

पोळी माथै अधिया किंवाड़ । हेलो सीधो आंगणै मांय पूगै । पण ताऊ रै कानां मांय कोनी पूगै अर ना ई सप-सप करती ताई रै । ताऊ लाई नै इयां ई घट सुणै अर इस्यै मांय ताई री बातां ? सुणै कियां ? इत्ती ताळ सूं भेळी हुयेड़ी बातां, सैंग री सैंग ताऊ रै बारकर घेरो देयां ऊभी हुवै । सगळी री सगळी, अड़ेअड़ । ताई री बात सुणै तो कोनी, पण मांय बिचाळै ताऊ अेकर ताई कानी देख लेवै अर मुळक पड़े । ताई रा हालता होठां रा बोल कानां ताई कोनी पूगै, पण ताई रै हालता होठां री हरकत पूगै... आंख्यां ताई । अेकर मुळकां पछै ताऊ जाणै सो-कीं भूल जावै अर पूठो ताणै-पेट मांय अचूम्ज जावै... निमोही-सो । जाणै कनै कोई कोनी ।

ताई आपरी धुन मांय बोल्यां जावै... बैल्यां जावै । इल्ली-बिल्ली सगळी कर धापै, पण ताई री बात कोनी मुकै । खेत-क्यार री बातां, डांगर-ढोर री बातां, बास-गळी री बातां... बातां ई बातां । अचाणचक कोई लुगाई रो जिकर आवै अर ताई, ताऊ खातर चिंत्या करै । चिंत्या करै तो ताई रो सुर और भांत रो हुय जावै ।

“...थे क्यामी जाया करो बनवारिये आळै घरां ? पूरै गामै ऊगी हुयरी है... नागी रांड है बा... काळो चेप देयसी... आपणै तो पासो देयां राखो...”

समझाइस करती ताई अेकर ताऊ कानी देख्ये अर पछै सुर कीं और मंदो करती समझावै, “स्याणो ख्यांत राखियो...”

“सुल्तान... ओ सुल्तान ११...” अधिया किंवाड़ ऊपरांकर हेलो लगोलग आवै । हेलो पाड़णियो बेली आखतो हुय जावै, पण जोर कोनी । ठाह है कै सुल्तान बोळो है । सुणै कोनी, पण बीं बरगो बोरो कोनी बणावै कुणई । घुटवां बणत रो बोरो अंधेरै मांय पिछाण लेवो भलाई, “ओ तो सुल्तान रो बणायेड़ो है ।” सगै रो समाचार आयां नै कई दिन हुयग्या । आईज्यो ई कोनी । दो बोरां री जट पड़ी ही घरां । आज टैम लागी तो ल्यायो हो, पण औं किंवाड़ तो कोनी खोलै ? सुल्तान तो कोनी सुणै जको कोनी सुणै, पण बा बोळती ई कोनी सुणै ? हेलो पाड़णियो बेली मांय ई मांय फळीबंट हुवै, पण बीं रै सवालां रो पडूतर कुण देवै ।

“सुल्तान... ओ सुल्तान ११...”

“सुल्तान... ओ सुल्तान ११...”

हेलै माथै हेलो मारीजै। अधिया किंवाड़। किंवाड़ री बीणी पकड़र मचकावै बो... कदे कूंटो बजावै, पण कोनी सुणै जको कोनी सुणै। अखतायेडो बो ओजूं हेलो मारै।

“सुल्तान... ओ सुल्तान००...।” अर पैलां पूरोड़ा हेलां रै लारै अेक और हेलो जाय ऊभो हुय जावै। ताऊ रै कोई फरक कोनी। फरक ताई रै ई कोनी। सुणण नै तो ताई नै कीं बेसी सुणीजै, पण ताई नै सुणणै री बिरिया तो कोनी। ताई रा समाचार नीवडै तो ई बिरिया मिलै नीं।

“असलमियै री बीनणी सलामूडै साथै मोटरसाईकिल माथै चढी बगै ही...।”

“धरमलै री छोटोड़ी छोरी सतमासियो जाम्यो है...।”

‘राजूडै री भैंस मरगी.... भैंस काई मरगी, लाई रा टाबर ई रुळग्या। ले-देय’र इत्तो ई तो आसरो हो... बो ई खोस लियो रामजी...।’

“बो रूपो कोई माणस है?... भाण-बेटी कीं कोनी लागै बीं रै... मरज्याणो पीठ तकै...।”

“रेवतियै काल छोरो परणायो जद तो काख पीटै हो अर आज बीनणी नै खायां ई कोनी धापै...।”

“ना ओ लुगाई री किसी जिनगी हुवै... ई नांव सूं तो पगआवी जूती ई आछी... पैहरणियो मेर तो करै...।” ताई री बातां चालती रैवै... चालती रैवै।

“सुल्तान... ओ सुल्तान००...।” बारला बोल अबै कीं आकरा हुवण लागै।

ताई नै कीं बैम हुवै। कान मांडै। अधिया किंवाड़ साम्हीं खुरहो करतो भाइडो धापग्यो। धापेड़ा बोल अबकै सुर बदल लियो... “सुल्तान... ओ सुल्तान००... अर ओ बोल्याऽ००...।”

रीस मांय नीसरेडो हेलो अबकै गोवी दाईं पूर्गे अर पैलां रै ऊभा हेलां नै छेकतो सीधो ताई रै कानां मांय जा लागै।

“बोल्याय... ओ बोल्याऽ००...।” ताई चिमकी। ताई नै चिमकता ताऊ ई देख्यो। ताई नै ताचकेडी देख ताऊ सो-कीं समझग्यो। बण आपरे हाथ री पिंडी बगायी अर उतावली-उतावली बारलै बारणै कानी हुय लियो।

ताई नै हेलै रा टप्पा तो पूरा-सूरा कोनी सुणीज्या, पण हेलो तो सुणीज्यो ई हो। ताई हेलो सुण्यो अर पछै आपोआप सूं ई बोली, “कोई हेलो मारै...।”

ताई बारै जावतै ताऊ कानी ख्यांत्यो अर ओजूं सरू हुयगी, “लोग हेला मारै... सुल्तान घरां हो काई... पण आनै काई मारै... हेला तो आं रै काम नै मारै...।”

बैलतां थकां ताई री कचकोळ्यां-सी आंख्यां मांय जाणै कुणई हेलो दुसरावै हो, “अमरा... ओ अमरा००... घरां है काई...?”



कहाणी



डॉ. अनिता वर्मा

पेमली

विधाता को न्याव ऊंकी मन मरजी सूं ई होबू करै छै। ऊंकी लीला अपरंपार, कुण समझ सकै। लोगदनी खेवै छै। चावै जतनो कोसिस कर त्यो, पण बेमाता न जै करम में मांड द्व्यो, मटायां न मटै। जतना फोड़ा भाग में लिख्या छै, अतना तो भुगतणी ई पड़ै, फेर हंस'र दन काढो कै रोय'र काढो, कुण कै फरक पडै छै।

पेमली की कहाणी बी अस्यी छै—आकास की पटकी अर धरती माता नीं झेली। नांव छो प्रेमलता, पण गांव का संदा मिनख ऊंनै पेमली ई कैवै छा, यो ऊंको परेम को नांव छो, जिनै सुणतां ई वा भागी चली आवै छी। कदी तो सोचणो पड़ जावै कै बैमाता न अस्या मनख बी आज का जमारा में घड़ मेल्या छै। कोई सूं काँई शिकायत कोनी अर कस्यी शिकायत जाणै काँई भान ई कोनै छो पेमली कै ताँई। बालपण सूं अभागी छी पेमली। जनमता ई ऊंकी मां सुरग सिधारगी अर बाप नै दारू पीबा सूं ई जक कोनी पडै छी। जीं दिन ऊंको जनम होयो, मां रुकमी ऊंनै जनम देय'र सुरग सिधारगी। आस-पास का पड़ोसी भेला होयग्या। नाहो जीव अर ऊंको दारूङ्यो बाप छो। कोई संभाल्बा हालो रस्तेदार घर में कोनै छौ। ““अे रामजी! कस्यो संकट आण पड़यो?”” पेमली का मामा-मामी बोल्या छा। वै बैन की सुणतां ई गांव आण पूऱ्या छा।

:: ठिकाणो ::
‘संस्कृति’
विकास कॉलोनी-3
कोटा (राज.) 324002
मो. 9351350787

““अब काँई होवैगो... कस्यां पार पडैगी यो नाहो जीव बना माई का दूध कै कस्यां जीवैगो?”” लोग-लुगाई आपसरी में बोलबा लाग्या छा। पेमली का मामा न नन्हा जीव कै ताँई अपणी घरहाली कै ताँई सूंप दी छी। ऊंकै अेक महीना पैली ई छोरो पैदा होयो छो। ““इनै बी दूध पा दै।”” मामो, मामी सूं बोल'र पाढो

बैन रुक्मी की देह के पास जा बैठ्यो छो। पेमली को बाप रमेश जस्यो बी छो, पण छो तो बाप ई। बारां पाड़-पाड़'र रोबा कै सिवा काँई कर सकै छो।

“म्हनै माफ कर दीजो रुक्मी, थारै तांई म्हनै घणो दुख दियो, तू म्हारै तांई कस्या संकट में छोडगी। ई नन्हा जीव नै म्हूं कस्यां पाठ्यूंगो।” पेमली को बाप रुक्मी का निर्जीव सरीर सूं चपक'र रोख्यो छो।

गांव का संदा मिनख भेला होयग्या छो, पण कोई कै तांई सूझ न री छी कै काँई करां या कसी बिपता आण पडी रामजी। “अब जै होणी छी, वा होगी, रामजी की मरजी याई छी, पण अब काँई करणो छै।” गांव का बडा-बूढा ओक साथ बोल्या।

रमेश रोतो-रोतो घायल जस्यो होग्यो छो; ऊंकै तांई काँई सुधबुध कोनै छी, उ तो या दिनां पैल्यां सूं ई बेमार चालस्यो छो। दारू पीबा सूं सरीर घणो कमजोर होयग्यो छो। रुक्मी थारै म्हारै घरां में काम कर'र रोटी पाणी को इंतजाम जस्यां-तस्यां करै छी। पैली रमेश महीना में थोड़ा दिन मजूरी कर दारू पीबा कै बाद बच्या पीसा रुक्मी लड़-लड़ाकर ले लेवै छी। अस्यां घर की गाडी चाल री छी।

मामो जै घणी देर सूं गुमसुम होय'र बैठ्यो छो, ऊ बोल्यो, “रामजी सूं कुण जीत सकै छै, म्हांकी रुक्मी तो म्हानै छोडकै भगवान कै चरणां में जा पूगी, पण ऊंकी निसाणी छोडगी। आज सूं या म्हांकी होई, म्हारा शंकरिया कै लारै-लारै या बी पळ जावैगी, मरबा काजै ई नन्ही जान नै अठी तो थोड़ी छोड़'र जावांगा।”

गांव हाला का सैयोग सूं संदो कामकाज नमटग्यो। बेमार रमेश अर नन्ही जान नै भारी मन सूं लेय'र मामा-मामी आपणै घरां आयग्या। मामो पेमली पै जान दयै छो, पण मामी बोलबा में थोड़ी करड़ी छी। पण जस्यो बी छी, अपणा आंचळ को सायरो तो उनै ई द्यो। ऊंठी नै रमेश नै जाणै खाटलो ई पकड़ल्यो छो, पण पेमली नै देख'र जाणै ऊंमें जान आ जावै छी। पेमली नांव उनै ई पाड़यो छो। ऊंकी खाट पै जद पैली बार पेमली कै तांई सुआण्यो, रमेश रुक्मी कै भाई-भोजाई सूं हाश जोड़'र बोल्यो, “थांकै तांई बी म्हनै घणी गाल्यां काढी, भली-बुरी बातां खी, म्हारै तांई माफ कर द्यो, रुक्मी की निसाणी को ध्यान राखजो, म्हारो काँई भरोसो, आज मर्या काल दूसरो दिन... हां, आज सूं ई नन्ही जान को नांव प्रेमलता छै। म्हारी प्रेमलता म्हारी लाडली, भगवान ईनै अर थांनै सुखी राखै।”

समै बीतता काँई बार लागै छै। प्रेमलता छह महीना की हो चाली छी, पण ऊंको नांव प्रेमलता सूं पेमली होयग्यो छो। प्रेमलता कोई न बोलतो। पेमली-पेमली संदा घर हाला अर गांव हाला बुलाता। मामी अपणा बेटा शंकर कै लारै-लारै पेमली नै बी अपणो दूध पाय दयै छी।

पेमली में जाणे जान आयगी छी। मां कै रूप में ऊनै तो मामी ई मली। ऊ अण समझ काजै काई मां अर काई मामी, वा ई पेमली की सब-कुछ छी। बिधाता की मरजी कै बना पत्तो बी न हाल सकै। मामा न रमेश को घणो इलाज करायो, पण काई इलाज न लायगो। ऊंकी हालत घणी बिगड़ती जा री छी। रुकमी कै जाबा कै बाद जाणे ऊनै जीबा की आस छोड़ दी छी... हिम्मत हार बैठ्यो छो अर एक दिन ऊं बी पेमली नै छोड़ 'र रुकमी सूं जा मिल्यो। बिना मां-बाप की होगी छी पेमली, पण मामो घणी जान पेमली पै देवै छो। पेमली मामी की डांट अर मामा का दुलार सूं नानेरा में पल री छी। मामी कदी-कदी कैय देंती, “संदा म्हारै माथै ई छै। या कमी रैगी छी या बी पूरी होगी, छोरी की जिम्मेदारी घणो दोरो काम छै ।”

मामी भल्यां सूं कड़ी बात कैय दचै छी, पण पेमली में ऊंको बी मन रमबा लायगो। दूध पुआबा सूं ओक रस्तो जाणै जीव सूं जीव को जुड़ायो छो। कहतां-सुणतां पेमली बड़ी होगी। मामा, शंकर अर पेमली को नांव ओक स्कूल में मंडा दियो। पेमली पढबा में घणी होसियार निकली अर शंकर को पढबा में चित कम ई लागै छो। गांव में कबड्डीं देतो फरतो। संदा गांव हाल्या कैता, “शंकरिया नै तो मां-बाप को नांव रोसन कर मेल्यो छै। ओटंग करबा में सबसूं आगै छै। पढबा में ढपोरशंख छै।” अर बिना मां-बाप की पेमली कै ताई कहता—“देखो, अपणै रस्तै जाणो अर अपणै रस्तै आणो। अपणा नाना-मामा को नांव रोसन करेगी पेमली।” गांव हाल्या शंकर की शिकायतां लेय 'र आता। डांट-फटकार पड़ती, पण ऊंकै कान पै जूं बी न रेंगै छी। अठी पेमली बढिया नंबर सूं बाहरवीं कक्षा पास होयी छी। शंकर फेर फेल होयग्यो छो। मामी कल्पती होयी बोली, “काई करां जणा कस्या भाग लिखा 'र लाया छा। ओक छोरो, ऊं बी काई गत को कोनै। बुढापा में म्हांको काई होवैगो? न तो ई छोरा को काम में चेतो, न पढबा में, फेर फेल होयग्यो, ईनै कस्यां समझावां ?”

“मां, थे काई चिंता मत करो, म्हूं छूं न, शंकरियो समै पै समझ जावैगो।” पेमली घणी समझदारी सूं कैती।

या सुण 'र मामो घणो खुश हो जातो। पेमली मामी नै शंकर कै लाई मां ई बुलावै छी। पण मामी तो मामी छी, कदी-कदी रोस माथै कह देवै छी, “या छोरीजात काई न्याल करैगी। पराया घरां चली जावैगी।”

मामो समझातो, “शंकरिया की मां, तुं कस्यी बातां लेय 'र बैठ जावै छै। आजकाल जमानो बदल्यग्यो। छोर्चां छोरा सूं कम कोनै।” अस्यी बातां सुण पेमली घणी उदास हो जाती। अब वा समझबा लागगी छी। म्हारा मां-बाप छोड़ 'र चला गया। म्हनै तो काई याद बी कोनै, पण काई उपाय छै। मनड़ा नै समझाती उफणता बिचारा नै विराम देती, फेर हंसती थकी अपणा काम पै लाग जावै छी।

शंकरियो संदा गांव में भूस्या खातो फिरतो लोगां का ओटंग करतो। पेमली को पढबा में घणो ध्यान छो। मामा नै मामी कै ताई समझा दी छी। गांव कै पांच कोस सरकारी नयो कॉलेज खुलगयो छो। पेमली कै ताई मामो पढबा मेल दी छी। मामी को प्रेम अर झुकाव पेमली की आडी होबा लागयो छो। सबसूं कैती, “म्हारी पेमली संदा परिवार को नांव रोसन कर देगी, आजकाल काई बेटा अर बेटी, सब बरोबर छे। इका पढबा सूं म्हांको मिनख-जमारो बी सुधरग्यो, न तो काई करता। छोरो तो सुणै कोनै। पढबा सूं ई पार लागैगी। आज छोस्यां काई छोरा सूं कम छै। घरहाव्यान की सबसूं पैली बेटी नै ई दुखै छै। भगवान म्हारी पेमली नै सुखी राखै।”

अब मामी की सोच में घणो बदलाव आयग्यो छो। पेमली रोजीना बस सूं कॉलेज जाबा लागगी छी। मामी कै लारां घर में हाथ बंटाती, मामा की सेवा करती अर उठी शंकरियो बंड बण 'र घूमतो, कदी नदी किनारै बैठ 'र पाणी में भाटा फेंकतो, रुख की डांडी तोड़ 'र ढांढा-ढोर नै धेर 'र भगातो। वै मूक जानवर डरप कै भागता तो ताळ्यां पीटतो घणो खुस होतो। पढबा में ऊंको चेतो कोनै छो। थोड़ा दिन पाछै पढाई बी शंकर नै छोड दी छी। हां, पण पेमली सूं घणो प्रेम छो। ऊंको घणो ध्यान राखै छो। जद वा कॉलेज जाती, तो ऊंसूं शंकर कैतो, “पेमली थारै ताई काई काई कैवे तो म्हनै बताजै, म्हूं ऊंको सारो दिमाग ठकाणै लगा द्यूंगो।”

पेमली हांस 'र कैती, “भाया, तूं चिंता मत कर। म्हूं बी थारी बैन छूं। म्हूं काई कोई सूं कम छूं। थारै ताणी तो बात पुगैगी बी कोनी।” शंकर सुण 'र बोल्यो, “ठीक छै, पण म्हूं थासूं बडो छूं अर भाई छूं। द्वारो बी तो फरज बणै छै न!”

जीवण का न्याव्या-न्याव्या रंग, भगवान सूं कुण जीत सकै छै। ऊंकी लीला अपंपार छै। समै रेत ज्यूं हाथां सूं जाणै फिसळतो जावै छो। बिना मां-बाप की पेमली का धिनभाग, जै मामा-मामी का आसीस सूं पढरी छी। दिन भाया जास्या छा। पेमली बी.ओ. पैला नंबर सूं पास होयी छी। मामा-मामी घणा राजी छा। मामो गांव हाला सूं कैतो फरस्यो छो, “घर की लिछमी छै म्हांकी पेमली। इकै आबा सूं म्हांकै घर में जाणै रैनक आयगी। सब अपणो-अपणो भाग लेय 'र आवै छै।”

अठी कॉलेज में बी.ओ. ताई पढाई छो। अब बी.ओ. सूं आगै शहर में जाणो पड़तो। “अब काई करां? घणी पढली। पेमली कै लेखै बढिया छोरो ढूँढबो सरू कर द्यो, स्याणी होगी। अब या जिम्मेवारी बी आपण पूरी कर द्यां, आगै ईको भाग छै।” मामी पेमली का मामा सूं बोली।

पेमली या सुण 'र छानमून होय 'र बैठगी। घणी समझदार छी पेमली। संदी बातां नै समझै छी। मामा-मामी नै काई कसर न छोडी छी। पढाई-लिखाई अर अतनी बडी कर दी। वा हिमत सूं बोली, “मामाजी! ...मां! म्हूं बी.ओ.ड. करबो चाहूं छूं। मास्टरणी बण 'र थांको स्हारो बणूंगी, थांको नांव रोसन करूंगी, थांकी सेवा करूंगी, थांनै म्हरै ताई

पेट काट'र पढ़ायो छै, अब म्हारी या हूंस बी पूरी करदयो, म्हनै म्हारी भायल्या कै लार बी.अेड. को फार्म थांसूं बिना पूछ्यां भर दियो छो। म्हारो ट्रेनिंग लेखै नंबर बी आयग्यो। थां कस्यां बी म्हारी फीस को इंतजाम करदयो। सारो करजो अेक झटका कै उतर जावैगो ।”

दिन बीतस्या छा। पेमली नै वाई करी जै ऊंकै मन में छी। मामा-मामी नै घणी सोची। “काईं जाणे पेमली काईं करैगी, पण आपण नै अतनो कस्यो तो ईंकी या मंसा बी पूरी कर द्यां।” मामो बोल्यो छो। सुण'र करजो कढाँ'र पेमली को अेडमिसन करायो। पढाई पूरी होतां ई स्कूल की नौकरी का फार्म आयग्या। ट्रेनिंग में पेमली की पोजीशन आई छी पैलै नंबर। पैलै नंबर भी संदा जिला भर में छी। संदा गांव में पेमली अर ऊंका मामा-मामी की चरचा छी, “घणो पुन्य को काम कर दियो पेमली का मामा-मामी। बैण की निसाणी को जमारो सुधार दियो, खुद को बी जनम सफळ कर लियो। काईं बेटा अर काईं बेटी।” गांव हाला कैबा लाग्या छा।

अेक दिन सूरज की किरणां पै सवार होय'र खुशियां पेमली का नानेरा में आय'र ढेरो डाल दियो। सदा संकट का बादवा जाणै छंटग्या। खुशी की लहर जाणै च्यारूंमेर फैलगी। पेमली का मूँडा सूं बोल कोनै फूटस्या छा। आंख्यां डब-डबायगी। पेमली की सरकारी नौकरी आयगी छी। ऊंकै ताईं अेक पखवाडै कै भीतर नौकरी ज्वाइन करणी छी। घर में चौमेर खुशी छायगी छी। शंकरियो घणो खुश होय'र संदा गांव में ढिंढोरो पीटस्यो छो, “म्हारी बैण पेमली मास्टरणी बणगी... म्हारी पेमली घणी हुंसियार छै। काकाजी सुणो! पेमली मास्टरणी बणगी।

घर की आडी भागता होया ऊंकी सांस फूलगी छी, “मां-बाऊजी! देखो आपणी पेमली की नौकरी आयगी, यो देखो रिजल्ट। आजकाल रिजल्ट मोबाइल में बी आ ज्यावै छै।” या सुण'र मामा-मामी काईं न बोल पाया। पेमली मामा अर मामी खनै आयगी छी। मामी पेमली नै छाती सूं चपका'र बोली, “थनै तो म्हा संदा को मिनख-जमारो सुधार दियो। घर का संदा रोजणा मेट दिया अे म्हारी लाडो... म्हारी चिड़कली पेमली। म्हांकी रुकमी जाणै ईं लेखै ईं थनै मामा-मामी की झोळी में डाल'र गी छी। भगवान थनै खुश राखै, लंबी ऊमर देवै अर थारा मां-बाप की आत्मा नै सांति देवै। थनै म्हारो दूध को मान बढा दियो म्हारी पेमली!” या कहती थकी मामी नै पेमली की बाथ जोर सूं भरली छी। पेमली नै हाथ बढा'र भाई शंकरिया कै अर मामा का गळै में दोन्यूं हाथ डाल, हचक्या भर-भर रोबा लागगी छी।

“अरी पेमली! छानी होज्या बेटी, थनै तो मामा-मामी नै तार दिया, मामी कै दूध को करज उतार दियो।” घर में भीतर आती पड़ोस की जानकी काकी बोल री छी।



कहाणी



जीनस कंवर

आख्खरी जातरा

नरेश सा जोधपुर मांय रैवता। रंग सांवळो। आछी कद काठी। नौकरी भी सरकारी अर भगवान री दया सूं कीं कमी कोनी ही जीवन मांय। रामजी राजी। नरेश सा मन सूं ई राजा आदमी है अर फेर नाम भी नरेश तो पछै क्यूं नी व्है। हजार सदगुण नरेश सा मांय हा, पण अेक औगुण सगळा गुणां पर भारी पड़ै अर बो हो दारू पीबा री आदत।

जोधपुर में नरेश सा रो बंगलो सरदारपुरा मांय हो। पुराणे बंगलो देख 'र सगळा देखता ई रैय जावता। शानदार इमारत सब रो ध्यान खींचती। जोधपुर रा जिला कलेक्टर मांय नरेश सा अेकाउटेंट री पोस्ट पर काम करता हा। नरेश सा आपरै बंगलै सूं टाइम पर रवाना होवता अर आफिस पूगता। आखी कलेक्ट्री में सगळा नरेश सा री ईमानदारी री तारीफ करता हा।

नरेश सा रा पिताजी आछी पोस्ट पर रिया, इण वजै सूं धन-दौलत री कीं कमी कोनी ही। घणै रुआब वाला लोगां में दिन-रात उठबो बैठबो हो। आयै दिन घर में पार्टी व्हैती रैवती। इस्यो ई कोई दिन हो। दोस्त-भायला लोग बस अेक बार थोड़ीक दारू पाय दी। मन कोनी हो, पण बीं बगत प्रेम मांय चोट खायोड़। नरेश सा नै कीं नीं सूझियो। कॉलेज मांय सागै पढती सीमांतिनी सूं घणो प्रेम हो नरेश सा नै। आखिर चार साल कम कोनी हुवै कोई भी रिश्ता नै पलबा में। बीं बगत कितरा ई सुपना देख लिया हा, पण औ जात-समाज गेल फिरगो। घणी कोसीस करी समझाबा री, पण कोई पख समझाबा नै त्यार कोनी। मामलो बिगड़तो देख 'र लड़की भी घरवालां रै दबाव रा फेर में आयगी अर दूजी

:: ठिकाणो ::

943, रामनगर कॉलोनी
स्लैक्सी अस्पताल्हरै सार्हों

शास्त्री नगर

जयपुर (राज.) 302016
मो. 9462657601

जगह ब्यांव कर लियो। बस, आ ईज बात नरेश सा रै हियै में कांटा री भांत चुभगी। बांरे कहबो सही है कै साथ जीता-साथ मरता, पण वा मना क्यूं करी। सीमांतिनी मन सूं नरेश सा नै चावती ही, पण विरोध करबा सूं डरती। वा आ बात भी आछी तरां सूं जाणती ही कै उण रा विरोध काईं काम नीं करैगा। बीं री आवाज सगळा मिल 'र दबा देसी। सीमांतिनी नरेश सा नै जीवण साथी रै रूप में निराई सुपना दिखाया। बींनै पक्को विस्वास हो कै नरेश सा रै लाई उणरो जीवण राजी-खुशी बीतैला। परिवार, समाज रो सामनो करण री हिम्मत वीं में नीं ही। इणरो कारण औं हो कै परिवार अर समाज में वा ऐकली पड़गी। जो कोई अेक जणो भी वीं रो साथ देवा खातर व्हैतो तो वा जरूर विरोध करती। लाचार होय 'र वींनै घरवालों री बात मानणी पड़ी। निरी कोसिस करी भुलाबा खातर, पण याद तो भूत ज्यूं पीछो नीं छोड रथी ही अर अस्यी ही कोई घड़ी मांय दोस्त लोग दारू री मनवार कर दी तो दिल टूट्योड़ा नरेश सा भी घुटणा टेक दिया अर अेक ई घूंट में पूरी री पूरी गिलास खाली कर दी। बस, अेक बार संकोच टूटियो, तो फेर कद जरूरत अर शौक में अंतर खतम होयग्यो, पतो ई नीं पड़यो। पैलीपैल तो सरम लागी तो आपणी मां सूं माफी भी मांगी। पछै तो झिझक खुलगी। धीरे-धीरे समाज मांय आ बात फैलणी सरू होयगी कै नरेश सा सीमांतिनी नै भुलाबा खातर नशेड़ी होयग्या है। घरवाला नै चिंता होयगी कै बिरादरी में थू-थू होवैली। आपरी इज्जत में दाग लागतो देख 'र आनन-फानन में छोरी ढूंढबा लागा। घणी भागदौड़े रै पछै गरीब मां री हुनरमंद रतन बाई रै सागै जबरन नरेश सा रा फेरा पड़वा दिया। ब्यांव रो पूरो खरचो भी नरेश सा री मां सा ई दियो। नरेश सा भी ब्यांव रै पछै घणी कोसिस करी कै आपरी बींदणी नै मन सूं अपणा सकै, पण आती-जाती याद में बै न तो सीमांतिनी नै भुला सक्या अर ना ई आपरी लुगाई नै पूरी तरह सूं सीमांतिनी री जग्यां देय सक्या। अब नरेश सा में दारू रै साथै झल्लाहट भी बधती जा रैयी ही। परेशानी में मां अर लुगाई सूं झूठ बोलबो कद सरू कस्घो, खुद नरेश सा नै भी याद कोनी। दारू चीज ई औड़ी है कै मिनख सूं झूट-कपट रा काम करा देवै।

साची बात कैयग्या आपणा बडा-बडगर कै मिनख री संगती चोखी होवै तो आदमी रो सुभाव सोना सरीखो, नीं तो बिगाड़ता टैम कोनी लागै।

अठानै केई दिनां सूं नरेश सा री तबियत खराब चाल री ही। बै थोड़ा-सा ठीक होवता अर फेर दारू पी लेवता। डाक्टर साब दो दफां पैली भी कैयग्या कै दारू अबै थाँरे सरीर रै वास्तै जहर है, सो इणनै छोड-छिटकावो। कम सूं कम थाँरे छोटा टाबरां खातर ई मत पीवो, औ टाबर रुळ जासी। जका पईसा थे दारू में उडावो हो, अबार थाँनै ठा कोनी पड़ै। बगत आयां सूं पतो पड़सी, जद थे कोई सूं पईसा मांगसो। उण बगत सब थाँरे सूं मूंडो मोड़ लेवैला। थे समझदार हो, कानूनी री पढ़ाई भी कर राखी हो, अबै तो समझो,

दारू पीबा वाला रो माल भी जावै तो सागै माजनो भी जावै। देखो, संभल जावो, लिवर खराब होबो सरू होयग्यो है आपरो। चेता रियो हूं म्हैं थांनै!''

“अरे डाक्टर साब! थे भी काँई बार-बार समझावो हो म्हनै, म्हैं कोई टाबर हूं काँई? फेर म्हैं काँई थाँरे पईसां री पीऊं हूं, जो थे म्हनै समझाबा आ जाओ।'' नरेश सा नशा मांय गरब सूं कैयो।

“अरे बेटा, म्हैं थारै पिताजी रो भायलो हूं। इण सारू थारी पीड़ा आवै म्हनै, नींतर म्हनै काँई मतलब और सूं।''

अबै औ बातां रोज-रोज टेप्रिकार्डर जियां चालती-सी मालूम पड़े डॉक्टर साब अर नरेश सा दोन्यूं नै, क्यूंकै दोन्यूं ई अेक ई बंतल रोजीना दुसरावता रैवता... बै ई सबद अर बै ई हालात। बै ई घोड़ा अर बै ई मैदान।

घर में नरेश सा री मां, जकी कै पिचत्तर बरस री है, रात-दिन दुखी होवती रैवै बापड़ी। म्हैं काँई इस्यो ई बगत देखण सारू औलाद जणी ही। म्हैं जणी तो जणी, पर जलम ई बांझड़ी हुई। दुखी मन सूं अस्या ई उद्गार फूटै। नरेश सा री घरआळी भी घणो समझावती, सुधर जाओ थे। बा टाबरां रो वास्तो ई देंवती, पण दारू पीबा वाला कद सुधरै, जो नरेश सा सुधरता।

टैम निकल्तो गयो अर तीन बरस होयग्या दवाई-दारू चालतां, पण अबकी बार नरेश सा री तबियत घणी खराब हुई तो सगळा रिस्तेदारां नै भेला कर लिया। डाक्टर साब भी कैय दियो कै अबकै कोनी बचैला।

बेगी-बेगी सांसां आवती-जावती देख 'र घर रा अनुभवी जाणग्या कै कदै भी आखरी सांस हो सकै है, तो नरेश सा रै कान मांय दान-पुन बोलबा लाग्या। कोई पांच किलो बाजरो, तो कोई दस किलो ज्वार चिड़ी-चुगा खातर बोल्या। कोई कैयो कै भागवत गीता रो आठवों अध्याय सुणावो, जिणसूं कम तकलीफ रै मसाणै पधारै। अठीनै आठवों पाठ आधो ई बांच्यो होसी, कै सांसां री ढोर टूटगी अर नरेश सा देवलोक सारू घोड़ा हांक दिया।

पूरै परिवार पर मुसीबतां रो पहाड़ टूट पड़ो। परिवार रै नांव पर हो ई कुण। नरेश सा री पिचत्तर साल री मां, वारी लुगाई अर दो छोटा टाबरिया!

समाज मांय समचार पूर्या। समचार जाण 'र निराई जणा नरेश सा रै घर रै बारै भेला हुया। मोतबिर लोग आखरी जातरा री त्यारी में लागा। नरेश सा नै सिनान-संपाड़े करायो, गाभा बदल्या अर अरथी पर सुवाण्या। लोगबाग फूलमाला पैराई। अरथी उठातां ई अेक लारै आवाज उठी—राम नाम सत है, सत बोल्यां गत है। चार जणा अरथी नै लेय 'र बारै आया अर पछै कांधा बदल्ता मोक्षरथ रै कनै पूर्या। अरथी मोक्षरथ मांय राखीजी। घरवाला

अर रिश्तेदार लोग मोक्षरथ मांय बैठ्या। बाकी रा सगवा दागी खुद रा स्कूटर अर मोटरसाइकिल पर बैठ'र मसाण री आड़ी रवाना हुया। नरेश सा आखरी जातरा पर जाय रैया हा।

अबै अरथी नै ले जायां पछै पिचत्तर साल री मां रै साम्हीं बो ईज दरसाव जींवतो होययो, जद नरेश सा रा पिताजी सुरग सिधास्या हा। जद माथै सूं सिंदूर पूँछीन्यो हो, राल री टीकी हाथ सूं हटा दी गई, बिना गोटा-किनारी री ऊंधी लूगड़ी ओढाईजी ही। हाथां रो मूठियो झाड़ दियो गयो। अरथी रै उलटा फेरा दिगाया हा। कितरा पीड़ा रा कामां सूं भरियो हो औ टैम अेक लुगाई रै तांई। अेक तो धणी गयो, बियां ई कितरो बडो दुख अर ऊपर सूं औ रीत-रिवाज, जका फगत लुगाइयां रै वास्तै ईज बण्या है।

विधवा लुगाई री पीड़ा रो कठै अंत? बींद रै गयां पछै दूजै दिन परभातै बेगा उठ'र मूँडो ढांपती अर रिवाज रै खातर साथ मांय जतरा भी लोग सोग में बैठबा खातर आवै हा, वोरै नाश्ता-पाणी रो बंदोबस्त अलग सूं। समाज कैया करै कै मरबा वाळा री लुगाई नै चितार चितारबो जरुरी होवै अर औ क्रम बारवां तक चालतो रैवणो चाईजै। खेर, लुगाई रो मन तो रोवै ई है, पण आं कर्मकांडां मांय बेचारी रो तन-मन घणो घायल व्है जावै। मां ई हालत सूं जुरी तो अपणी बहू री पीड़ा नै समझ पा रैयी ही। मां रै मन मांय अेक पीड़ा आ भी ही कै बहू रो जीवण खराब करबा मांय खुद नै भी जिम्मेवार मानती, क्यूंकै आपरी झूठी शान खातर बेटा रो ब्यांव गरीब रतन बाईसा सूं कर दियो। ब्यांव में अेक मोटी रकम अंदर-अंदर रतन बाईसा रा पिता नै दीवी ही। आगै भी बगत-बगत पर पईसां सूं मदद रो वायदो करियो हो। गरीब आदमी भी मानै है कै पईसा भगवान कोनी, पण साच्चाणी तो भगवान सूं कम भी कोनी। मन मांय पिछतावै रो दुख घणो गैरो हुया करै है। साथै आ बात भी साची कै अेकसी पीड़ा भी लुगायां नै मन सूं अेक कर दिया करै। फेर आ तो लोक री बिरथा बात है कै लुगाई ई लुगाई री दुसमण हुवै है। जे संसार मांय लुगायां अेक मत हो जावै तो सत्ता पलट देवै है। बेटो तो आपणी दारू री आदत गेल गयो, पण बापड़ी बहू रो काई दोस है?


मां री बेगी ई चित्ततंद्रा टूटी अर बिचारी रोवती जा रैयी ही, पण विचारां री रेल दिमाग मांय छुक-छुक चालण लागरी। आपरी जिंदगी रो चित्रहार आख्यां रै सामने बेगो-बेगो चाल रैयो हो। मां बापड़ी रो पैली खुद रो धणी चलगयो। फेर वा आपरी सारी सगती टाबरां नै पाल्बा मांय खरच कर दी। सोची—बुढापा में सुख रा दिन देखैली। रात न रात नीं जाणी अर दिन नै दिन नीं जाणी। सब फरक भूलगी। बस, मन मांय अेक ई अलख जगाई कै म्हारा टाबर कीं बण जावै, तो म्हारै घर भी सुख रो सूरज ऊग जावै। मेहनत करबा में तो नरेश सा भी कोई कसर नीं छोडी, पण आपैर हालतां मांय मजबूती कोनी राख

सक्या। फेर आपरी आदतां री गुलामी करी। आगै परिणाम सामनै हो फेर, होणी रै आगै कीं री चालै है।

उणीज बगत काईं देखै कै नरेश सा री लुगाई नै ऊधी लूगड़ी ओढाबा री अर चूड़ी बधारणै री त्यारी व्है री है। नीं जाणै पिच्तर साल री नरेश सा री बूढी मां नै काईं सूझी जो बहूरै आडी फिरगी। कड़क आवाज में बोली, “बंद करो औं दकियानूसी रीत-रिवाज, जका लुगायां री पीड़ रा कारण बणै। म्हारो जिगर रो टुकड़ो म्हारो बेटो तो सुरग सिधारगयो। बो खुद री लुगाई नै इत्तरा दुख में देख 'र बियां ई पीड़ में होसी। थाँरे सगळां रै आगै हाथ जोड़ुं कै म्हारै मस्योड़ा बेटा री आतमा नै औरुं मत कळपावो।”

समाज री लुगायां कनै बैठी सब देख रैयी ही। बूढी लुगायां जरूर नाराज व्ही, पण आज री नूंवै विचारां वाली लुगायां राजी हुयी। सगळी लुगायां सासू अर बहू नै धीजो बंधा रैयी ही। इतरै में मां बोली, “पुराणै टैम में लुगायां धणी रै लारै सती होवती, पण भगवान भलो करै ब्रह्मसमाज रा राजा राममोहनजी राय रो। वै समाज सूं इण खराब रिवाज नै खत्तम करवायो। आज आपां महिला सशक्तीकरण री बातां करां, पण कोरी बातां ईंज करां। आज रै जुग में जे महिला री इज्जत नीं करैला, तो परिवार रो काम कोनी चालसी। म्हारी बहू पढी-लिखी है। जमानै रै सागै चाल 'र समाज में आगै बधसी अर टाबरां रो भविस बणसी।” औं कैय 'र बहू रो हाथ पकड़ 'र बींचे खुद रै कनै बैठा ली अर रोवती बहू रा आंसू पूँछ 'र माथै हाथ धर बोली, “देख बहू, काळजो तो म्हारो भी फाट रैयो है, पण तूं चिंता मत कर। आपां दोन्यूं मिल 'र हालात रो सामनो करस्यां। समै रै सागै सब ठीक होसी बावली! तूं रोवै मतना। म्हैं थाँरे सागै हूं। बहू ई सासूजी रै गळे मिल 'र बोली, “मां, अबै सासू-बहू दोन्यूं मिल 'र आपरै काळजै री कोर नै हमेस सारू विदाई दी।

◆◆



कहाणी



पायल गुप्ता 'पहल'

विधवा सुहागण

“नजर नीं लागै म्हारी छोरी नै...।” कमला नी मां अने देकतं में बोली पड़ी। शादी न दाढ़े कमला अने मस्त सुंदर देकैर्इ रै हति, एनी मां अने हत्ता रिश्तेदार खुश हता, पण कमला नै वदारै कोई खुशी न हत्ती। अने तो भणवूं हतु, पण मां-बाप नीं खुशी अगाड़ी काई ए बोली नई सकी। मां-बाप नु एम मानवु हतु कै वदारै भणैली, तो छोरी नै गाम में कोई छोरो नीं मिलैगा। अटले कमला नै स्कूल मोकळवु बंद करावी दीधू। कमला ना बाप खेतर में काम करते-करते ही धुलजी ना बाप थी वात नक्की करी अनै जल्दी-जल्दी कमला नै धुलजी थी परणावी दीधी।

जराक श्याम पण सुंदर नैण-नक्ष वारी कमला जीवन ना सुंदर सपना जोती अना पैलै ई खेतर में जोतवाई गई। शादी ना बीजे दाढ़े थी अनी हाउ गांगड़वा करवा मंडी हत्ती। नवी पत्रेली कमला खुद नु अे हामरती अनै मां-बाप नी बुराई पण हामरती। हाउ नी गारे तइ खावा करता वदारै खावा लागी। हत्ता घर नू काम करती नै खेतर नु अे काम करती, आ जोई ने धुलजी पण आळसी थवा लाग्यो। नवरो रेवा थी दारू भी अति पीवा लाग्यो। दारू पीय नै कमला नै कूठ्या वना ओक अे दाढ़े नीं नेकरतो।

खैर, समय नी गति प्रबल है। कमला नै ओक दाढ़े खबर पड़ी की ओ हवे नवा जीवन नै जनम आलवा लायक थई है। कमला मां बणवा नी त्यारी में हत्ती। आ खबर थी कमला खुश त हूं थाति, वदारे हिजरई गई। आवा घर परिवार ना माहौल में नवा जीव नै लाववा ना विचार थी कमला तो रोज मरवा लागी, पण धुलजी तो छोरा ना इंतजार में दारू पीवा नी अति करवा लाग्यो।

:: ठिकाणो ::

फ्लैट नं. 502
वर्धमान एनक्लेव, मदार
अजमेर(राज.) 305024
मो. 9414219355

कमला नी हाड़ तो अलान करि ने बेहि गई, “जो छोरी जणी तो मां-बेटी नो जीवू मुश्किल कर नाखुंगा।”

बेटी नु जनम नी थाय, अेवी प्रार्थना करते-करते, दारू ना नशा में धुत धुलजी नी मार खाते-खाते अने सासू नी गारे हामरते नौ महीना नेरी गया। जनम नो दाढ़ो आव्यो नै कमला ना गर्भ थी अेक सुंदर बालक नो जनम थयो। खुशी ना माहौल में सासूजी आक्खा फरा में मिठाई वांटी अनै धुलजी अेक पूरी बोतल पीय गयो। कमला ना मन में आज भी घबराहट हति कै बेटी जन्मी होत तो सुं थातु। प्रकास नाम रखणु बेटा नु। घर में, खेतर में काम करते अनै धुलजी नी दारू नी खाली बोतल अवेरते दस साल नेरी गया। अति दारू पीवा थी धुलजी नी हालत वगड़ती गई। दस-बार दाढ़ो थी अस्पताल में भरती धुलजी आज आखरी सांस लीधी। लाख कोशिश बाद भी कोई दवा काम नी आवी।

धुलजी तो शांत थयो, पण अेनी मां नो रूप शैतानी थईगयो। धुलजी नी मौत नो हत्तो वाक कमला माथै नाखी नै अने वतुली खावा मंडी हती। चिता नी आग ओलवाती अना पैलै तो कमला अने प्रकास नै घर थी बाहर नो रस्तो जोवाड़ दीधा—“थारै कनै थारो छोरो है, पण म्हारा छोरा नै खाईगी तूं।” कमला नी सासू एवु गांगड़ी।

कमला अनै प्रकास लाख हाथाजोड़ी करी, पण सासू कण भर अे नी नरमाई। मां अनै बेटो हत्ता गाम में रोता फस्या, पण रंडाई कमला नै आसरो तो दूर नी वात, कोईअे पाणी पीवाड़वा त्यार नी थ्यु। अेकली कमला बेटा नै लई अंधारी रातर में क्यां जती, रोई-तपड़ी नै पाढ़ी सासू ना पग में पड़ी। वऊ माते तो नीं, पण शायद नाना प्रकास नु मोडु जोई सासू नै जराक दया आवी। जेम-तेम बोली, “आंगड़ा में पड़य रो तमे बे जण।”

मजबूरी ना खातर पोता ना घर ना आंगड़ा में रेतै-रेतै अनै सासू नी गारे खातै छह-सात वरस नेरि गया। नानो प्रकास हवै मजबूत कद-काठी वारो किशोर थईगयो। सही खराब में अंतर करवा नी समझ भी उमर हाते वधी गई। बा अेनी मां नै रोज तवा करती जोई नै प्रकास हवै शांत रैवा लायक नहीं हतो।

“माँ, हवै औ घर नै औ गाम छोड़ देवा नो समै है, तूं तैयारी कर।” प्रकास कमला नो हाथ पकड़ी नै बोल्यो। कमला तुरंत बोली, “आ दुनिया वधारै खराब है बेटा, वना ठौर क्यां लई जाएगा?”

“तूं चाल मां, मेहनत-मजूरी करुंगा, दाढ़े अेक फरा रोटी खावा मलै तो वांदो नई, पण आ गारे हवै नत खवाती।” बेटा नी जिद अगाड़ी कमला मजबूर थई नै पेढ़ी उतरी पड़ी।

अजाओ गाम में जई बे जण घर-घर हाथ जोड़ा, पण कोई काम हाथ नई आव्यु। जेम-तेम मंदिर में रातर काढी नै वेला फेर काम मांगवा नेरी पड़ा। सांझ पड़ते-पड़ते

विधवा अनै रूपारी कमला समझी गई कै काम तो मली जाए, पण हाटे अनै... ! आवा विचार थी कमला कंपकंपाई गई। डरतै-डरतै जेम-तेम आज नी रातर भी मंदिर में काढ़ी।

“प्रकास, औं गाम छोड़वु पड़ैगा बेटा, तूं चाल!” सूरज उगतं में कमला ओं क्यू। वधारै सवाल-जवाब कीथा वना बे जण बस में बेहि रखाना थ्या। खूब दूर सफर करीनै अेक अजाण गाम ना मोड़ माथै बे जण उतरी पड़या। गाम में जता पैलै वना अेक सबद बोलै कमला टीकी, चूड़ी, मंगल्सूत्र अनै सिंदूर थी खुद नै सजावी बोली, “चाल प्रकास, ईं गाम में कदाक बढ़िया काम मली जाए।” प्रकास सन्न थई ग्यो, “मां, आ... ?” प्रकास नी वात पूरी थात पैलै कमला बोली, “मां नके कै मनै, आज थी आना गाम वास्तै अमै पति-पत्नी, कारण कै औं समाज विधवा बझरी नै वतुलि खावा त्यार है। मनै देखती हरेक निजर में खोट है, पाप है, लालस है।” प्रकास माथु पकड़ी नै बेहि ग्यो। मां नै जवाब आलता पैलै गया गाम ना सरपंच नी, दुकानदार नी अनै ऐना नौकर नी मां नै जोती नजरें याद आवी गई। जराक विसारी नै प्रकास बोल्यो, “तूं सुहागण थई जा मां, वांदो नथी पण धणी केम मां, मनै बेटो रैवा दे, मनै झई कई दे माँ।”

तुरंत कमला बोली, “ना प्रकास, सुहागण साथै ऐना धणी सिवा कोए नै ओजवायै। आज थी तारी मां विधवा सुहागण।” भारी मन थी बे जणं गाम में प्रवेश कर्यु अनै हाथाजोड़ी करी तो सरपंच ना खेतर में मजूरी नू काम मल्यु। सरपंच भी दया करी नै खेतर में अेक नानी टापरी रेवा हारू आली। बे जणं मेहनत-मजूरी करि नै जीवणयापन सरू कर्यु। गाम में कोइक वार प्रकाश नै ऐनी उमर थी बड़ी पत्नी हारू उपहास मलतो, पण मां नी खातिर वना बोलै हामरी लेतो।

समय तो पंछी है। पति-पत्नी ना रूप में मेहनत-मजूरी करतै-करतै छह-सात वरस बीजा नेरि ग्या। कमला गरीब जरूर हति, पण कोई सरपंच, कोई दूकानदार कै कोई बीजा पुरुस नी वांकी नजर ऐना पर नीं पड़ी। पड़ती भी हरते, ऐनो सुहाग ऐना साथै हतो। समय वधतो गयो अनै किशोर प्रकास भी हवै जवान रौबदार पुरुष थई ग्यो। ऐना मन में भी खुद ना भावी जीवण अनै जीवणसंगिनी ना विचार आवा लाग्या, पण मां नी खुशी खातर, मां नी सम्मानजनक जिंदगी खातर चुपचाप जीवण चालु राख्यु। ईं जे खुद परणवा नी वात करतो तो मां नै पाछी विधवा करवी पड़ती।

मां तो आखिर मां है, बेटा ना मन में चालती हत्ती वातां हामरी लीधी। तुरंत कमला फरी विधवा बणवा नु नक्की कर्यु।

“छोग, काल सरपंच साब थी मजूरी नो सब हिसाब कर लेजी, आपणै पोता ना गाम जावा नो टाइम आवी ग्यो।” कमला बोली।


“पण मां, गाम में तो औं पति-पत्नी वारो नाटक नी चालैगा, जोनी हत्ती तकलीफें तनै फेर जोवी पड़ेगा मां।” प्रकास ऐनी वात काटी नै बोल्यो।

“जवान बेटो साथै हो तो केनी हिम्मत कै विधवा मां ना सांमै जोई ले।” कमला गर्व थी आँख्यां चौड़ी करीनै कीधू।

पोताना गाम में प्रवेश थी पैलै कमला सुहाग नी हत्ती निशानी काढी मेली, ऐना हाते गया समय ना झूठ नो भार भी मन थी उतरी ग्यो। गाम में किराए नु घर लई मां-बेटो रैवा लाग्या। कमला नै नजीक नो फैकट्री में अनै प्रकास नै अेक दुकान में काम भी मली ग्यु। समय नेरतो ग्यो। प्रकास नो विवाह नजीक ना गाम नी आशा थी थ्यो अनै अेक सुंदर कन्या नो जनम भी थ्यो।

खुशहाल जिंदगी चालवा लागी। विधवा कमला हवै सुहागण नी थई नै भी खुश तो हत्ती, पण सगा बेटा नी पत्नी बणी जे समय काढ्यो, ई समै कमला वती भुलायेगा, मन नो भार उतरेगा कै नीं, यो तो कमला ई जाणे!

◆◆





राजाराम स्वर्णकार

बंदर-बांट

लुच्चा-बदमासां रा ऊंचा ठाठ है
चौड़े-धाड़े चालै बंदर-बांट है

धनवालां रै गिद्दा, तकिया रेसमी
बाकी घरां में तो टूटेड़ी खाट है

ऐकै कानी सगलो ई समाज है
दूजी कानी भायलां री जमात है

धोली-काली-भूरी टोप्यां ओढलो
पण टोप्यां रै हेठै गंजी टाट है

बेगी-बेगी भरलां आपां खोपडी
जोरदार सबदां री पड़ री छांट है

:: ठिकाणो ::
बर्तन बाजार
बीकानेर (राज.)
334005
मो. 9314754724

म्हारी तागत नै जाणै सै भायला,
दुनिया मानै राजाराम सप्राट है

लुच्चा-बदमासां रा ऊंचा ठाठ है
चौड़े-धाड़े चालै बंदर बांट है

काँई हाल है ?

बोल थारा काँई हाल है
जेबां में अणूतो माल है
चोरी-चकारी कर लूट्यो
औ सगलां नै मलाल है

जग नै नीं लेवण दै जक
भायलां रो लेवै है भख
जाणूं हूं मोटी खाल है
बोल थार काँई हाल है

मूँछ्यां काँई ताणै है शूं
सांमै खड़यो थारै काळ है
ऊभो है नाड़की न्हाख 'र
जाणूं हूं आ नई चाल है

ध्यान राखजै रे मायावी
अबकी थारो फोरो साल है
जेबां में थारै अणूतो माल है
बोल थारो काँई हाल है ?

◆◆



पूनम चंद गोदारा

चिड़कल

होणो है, सो होणो है

पांख्यां नै कर भारी चिड़कल
ऊंची भर उडारी चिड़कल

जो होणो है, सो होणो है
फिर किण बात रो रोणो है

जुलम जमानै रा भोग्या सै
थूं पण है कद हारी चिड़कल

राजा, रंक रळ्या सब रेतां
सब झूठो रोणो-धोणो है

अेक न अेक दिन होणी चौड़ै
करतूतां बै सारी चिड़कल

रीत-रिवाज 'र रिस्ता-नाता
जगती में सो-कर्हो ढोणो है

के हिम्मत है, आंख मिलावै
मींटां राखो खारी चिड़कल

ई मिजळी दुनियादारी में
बेल्यां इतबार खोणो है

साम्हां आय घुरावै गीदड़
तो बण जाणो नारी चिड़कल

मोह-माया रा बंधन छूटै
तो सुख री सेजां सोणो है

थूं रणचंडी झांसी दुर्गा
थारी शेर सवारी चिड़कल
गुसाईसर बड़ा
तहसील-श्रीडुंगरगढ़
(बीकानेर) राजस्थान
मो. 9799305760

अब औलान खुलो कर दै कै
अब है बारी म्हारी चिड़कल

राम रुठ्या प्राण छूट्या
मिट्टी नै मिट्टी होणो है

◆◆

कविता



सीमा पारीक

सटको

कोई बात लेय 'र जी रै मांय
जद बार-बार हुवै खटको
तो सुणाय दो सटको

जद कोझी तरहां भर जावै
सहन-सगती रो मटको
तो सुणाय दो सटको

समझदार नै तो सैन ई घणी
मूरखां नै तो मारणो ई पडै फटको
तो सुणाय दो सटको

हर बार आपां ई नीची क्यूँ खींचां
मेटणो ई पड़सी जी रो भटको
तो सुणाय दो सटको

अेक सूँ दूजी बार नीं मांगैला
दिखावणो ई पड़सी जोर सूँ झटको
तो सुणाय दो सटको।



गोरी थारो रूप

नैणां री बात सुणावै
 चकोरी चंद नै
 तकै ज्यूं पूरी रात
 ओढणी में लाज
 मुळकाण में मिठास
 गोरी थारो रूप है
 म्हारी अतृप्त तिरस
 चांदी सिरसो रंग
 सोनै सिरसा बाल
 हूं उळझ्यो हूं थारै
 सुरमतै रूप जाळ
 मैंदी रचिया हाथां में
 प्रीत री लकीर
 अब इलाज नीं राखै
 कोई पीर फकीर
 पायल री झाणकार
 कंगन री टणकार
 पग-पग में बसी
 थारै फुटरापै री झंकार
 थारै काजल री
 काईं लिखूं बात
 मिरगानैणी ज्यूं
 तकूं दिन-रात
 रूप री राणी
 थारो सिणगार
 मंदिर में देवी ज्यूं थरपर
 म्हैं पूजूं थनै ईं दिन रात
 करे बंद म्हारै
 मनडै रा किंवाड़।



रुतां रो मेळो

चैत-बैसाख में
 सूरजड़ो खीरा बरसावै
 धरती सूखी
 पंखीड़ा पंख पसारै
 तपती लू में तनड़ो
 खेलरी दाईं सुखावै

 आसाढ-सावण में
 मेह, धुआं उडावै
 धरती रो हियो हरखावै
 काकड़िया-मतीरिया
 कैर-सांगरी
 मरुभोम री ओळखाण बतावै

आयो पौस-माघ
 अब लेय सियाळो
 खालडैं री खोह में
 जबरो धसकावै
 बाजरी रो सोगरो
 अर काचरियां रो साग
 मनडै नै अणूतो
 तिरपत कर जावै

फागणियै री रुत रंगीली
 नामेक ठंडी-मीठी
 फूलां री सौरम, पून रा गीत
 राजस्थान री रितुआं
 भर दे मनडै में प्रीत।

◆◆

कृंत



दुलाराम सहारण

‘आस-औलाद’ में ल्हुक्या आगलै रचाव रा अैनाण

राजस्थानी री आधुनिक कहाणी-जातरा में श्रीझूंगरगढ़ रो अेक लूंठो मुकाम है। मालचंद तिवाड़ी, मदन सैनी, चेतन स्वामी, श्रीभगवान सैनी, सत्यदीप आद री कहाणियां राजस्थानी पाठकां नै आपरी ओप साथै मोवती रैवै। नवै बोध अर नवी लकब साथली समझ इण गांव में श्रीझूंगरगढ़ पुस्तकालय री सबब्लाई सूं तो बणी ई बणी, पण साथै ई श्याम महर्षि री लगोलग साधना इणमें हूंस सूंपबो करी। अेक माहौल बण्यो अर इण माहौल में चोखी निपज हुयी। किसान री भासा में कैवूं तो खेत घणो ऊरमावान हुवो भलाईं पण वीरी चोखी सार-संभाळ नीं करीजै, चोखो बायरो नीं मिलै, बगतसर बिजाई नीं हुवै, बिजाई में सखरो बीज नीं बरतीजै तो खेत खड़यो अड़कबीज ई उगावै, जोगता फल कदैई नीं निपजावै। इणी ढालै श्रीझूंगरगढ़ री धोरां धरती रा औ साहित्यिक खेत निपजावू तो हा, क्यूंके आनै बडेरां सूं चोखी राजस्थानी पाल्पोख मिली, ठेठ मूळ री सबद-संपदा मिली, पण वीं में बायरो सिरज्यो पुस्तकालय अर श्याम महर्षि नांव रै मिनख। आं खेतां री हरेक हफ्तै सार-संभाळ करीजी, गोस्तियां करीजी, जरुरी-जरुरी बीज छांटीज्या, वाँै बगतसर तोपीज्या। बगत-बायरै ई सागो दियो अर चोखी निपज बखारी आय लागी।

इण भरेड़ी बखारी रा जोगता नांवां में सूं अेक नांव है—
मदन सैनी रो।

मदन सैनी नै जाणणियां जाणै कै वै ब्यौवारू मिनख है जिका तो है, खुद खटनै आगलै रो भला करणियां है। म्हारै चेतै है

:: ठिकाणो ::
पार्क रे नेडै, गांधीनगर
चूरू (राज.) 331001
मो. 8619951603

कै बी.ओ. रै दिनां में म्हारो वां सूं जद कागद-ब्यौवार बण्यो अर हेत घल्यो तो वां ई बतायो कै चूरू में दुर्गेश अर श्रीभगवान सैनी सूं मिलो । वां अर भंवरलाल भ्रमर ई बतायो कै राजस्थानी भाषा साहित्य एवं संस्कृति अकादमी, बीकानेर कॉलेज रा पढेसरियां खातर भत्तमाल जोसी पुरस्कार री अेक विगत राखै । औ बतावणो अर आंगळी-सीध करनै आगीनै बधावणो वांरी विरासत तो है ई, पण वांरै भलेरै सुभाव रो दाखलो ई है । इण्सूं आगीनै बधां तो जोड़ायत कृष्णा री पीअेच.डी. रा वै गाइड बणनै काम नै इयां सांभ्यो जाए बडो भाई बध-बधनै हेत सूंपतो व्है । औ बिनां की लाभ-घाटै रै अेक मानस नै चोखो साबत करण रो ब्यौवार हो, जिको औ ओळ्यां लिखती वला आज कथण में आवै ।

मदन सैनी रै व्यक्तित्व नै लेयनै घणो कीं कथीज सकै, उणी ढंग सूं वांरै रचनात्मक कर्तृत्व नै लेयनै ई मोकळी बातां करीज सकै । बियांस तो मदन सैनी अेक टाबर है । टाबर जैड़ो मन अर टाबर जैड़ा सीधा-सा हरफ । पण खासियत कै वांरी रचनावां टाबर अर ग्यान री गांठडी बांधेड़ा दोनुवां सारू अेक जैड़ी हुवै । सीधी-सी बांचो अर छेकड़लग पूगो । जद ई तो आलोचक चेतन स्वामी कथै, “कैवत है कै लिखरे रै व्यक्तित्व री झलक उणरै लेखण मांय आयां बिना कोनी रैवै । हद दरजै री सहवाई, सैजपणो अर सरलता जैड़ी मदन रै व्यक्तित्व मांय है, वैड़ी री वैड़ी उणरी कहाणियां मांय मौजूद है । कहाणियां अवस न्यारी-न्यारी है, पण अंतरदीठ सागण ई रैवै ।” (आस-औलाद, पानो-7)

मदन सैनी राजस्थानी में ‘जागती जोत’, ‘माणक’ आद पत्रिकावां में छपनै पैलपोत ‘फुरसत’ कहाणी पोथी रै मारफत ऊभा हुया । इणी पोथी नै 1999 में राजस्थानी भाषा, साहित्य एवं संस्कृति अकादमी, बीकानेर रो ‘मुरलीधर व्यास कथा पुरस्कार’ मिल्यो । इण पछै कहाणी पोथी ‘भोळी बाता’ आयी । अबै बरस 2023 में नवी पोथी ‘आस-औलाद’ आयी है । इण रै पूठै साहित्यकार शंकरसिंह राजपुरोहित लिखै, “आस-औलाद डॉ. मदन सैनी रो तीजो कहाणी-संग्रें है, जको लगेटगै बीस बरसां बाद छ्यो है । इणमें फगत इग्यारै कहाणियां है । कैवण रो अरथ औ कै वै कहाणियां कम लिखै, पण जकी लिखै वै पाठकां रै मन-मगज में आपरी अलायदी छाप छोडै अर कहाणी रा पात्र सुधी पाठक री चितार सूं बिसास्यां नीं बिसरै ।” (आस-औलाद, फ्लैप-1)

मदन सैनी री नवी कहाणी पोथी ‘आस-औलाद’ में इग्यारै नीं, बारह कहाणियां है—‘चेड़ो’, ‘नामरद’, ‘तागड़ी’, ‘सौराई’, ‘आस-औलाद’, ‘हेताळू’, ‘दाग’, ‘बदलाव’, ‘छींकी’, ‘मुगती’, ‘खेल’ अर ‘आप-आपरार भाग’ । समकालीन आधुनिक कहाणियां रै संचै आं नै कूंतां तो औ कहाणियां सरलमनां लिखारै री भोळी बातां-सी लागै । पण औ भोळी बातां वां पाठकां रै हीयै रमै जिका पाठक हाल ई आदस्वाद रै वीं तागै ताण साहित्य-समाज री कूंत करै, जिको सत्त री तांत बाजै । सत्त गयां पत है, अर सत बोल्यां

ई मुगत हैं री आ सामाजिक व्यवस्था मदन सैनी नों फगत आपरी सोच में देखै, पण इण रचाव में सांपरत ई करै।

सिरै कहाणी में 'आस-औलाद' री सौगन खावतै गवाह री पींडी धूजै अर वो पंचायती छोडनै चाल बहीर हुवै, वीं गवाह नै लागै कै मुकदमै सूं बेसी आस-औलाद है अर आस-औलाद माथै सत री पत नों डिगण देवणी चाईजै। जदकै दुनियावी साच इणसूं उळ्ठ है। कूड़ री कचेड़ी अर झूठ रै मुकदमा तिरतै इण समाज में पाठक इण रचनां नै जूनी माननै खारज करै तो करो भलाई, पण मदन सैनी रो तो गवाह जान मोहम्मद रो औं ई साचलो समाज है अर इणी रै ओळै-दोळै वानै रचणो चोखो लागै।


धरम री फरूकती धजा बिचालै डोरा-डांडां अर मंतर-जंतर सागै आखा देखनै तागड़ी ढूँढण रा किस्सा कद 'चेड़े' अर 'तागड़ी' बणनै कहाणी बण जावै, कैयीजै नों। मदन सैनी जैड़ा कहाणीकार इणां नै इत्ती सरळता सूं पाठकां साम्हीं परुसै कै पाठक कैवै—“काँई हरेक घटणा कहाणी हुवै?” औं पाठक 'दाग', 'हेताळू' अर 'बदल्लाव' कहाणियां पेटै ई सागण बात कैवै तो कीं आंट कोनीं।

कहाणी 'नामरद' अर 'छोंकी' इण पोथी री जोरावर कहाणियां हैं। नामरद कहाणी में बगत री ठीकसर सिरजणा करीजी है तो वठैर्द बायरै में कथ्य मेल खावै। सत रै पथ करणीदान अर डावड़ी सूवटी री काम-मनोदसा नै ऊजलै सरुप राखता थकां ई कहाणीकार सो-कीं कैवै अर इण मनोविग्यान नै पाठक साम्हीं राखै। 'छोंकी' में ई आपरी भेड़ अर कुत्तै साथलै हेत में हबोला खावतै गवाल्हियै नानियै री सोसण रै खिलाफ सोच अर छेकड़ विरोध री हूंस अेक नवो सरुप रचाव में राचै। म्हारी दीठ में आ कहाणी इण संग्रै री सिरै कहाणी है। बियांस तो मदन सैनी टीटण रै ओळावै रचाव राचता ई जस कमावै अर भोली बातां करता-करता मघजी-जगनजी जैड़ा पात्रां नै अमर कर जावै, बियां ई नानिया-मोटिया पात्र ई आपरी साख थरपणा में ढूकै।

इणी साख थरपणा में 'सौराई' कहाणी रा कथानायक किसनोजी जूँझै। खेतीखड़, मजदूर, मैण्टी मिनख जिकै दिन आपरै गोडां रो पत गेर देवै कै पछै थितियां गिराय देवै, वीं दिन उणरो मरण मानीजै। गांव भाजतै मिनखां नै सौराई सूंपण री टाबरां री हूंस देखै तो वीं सौराई में गटागट जावता मिनख ई देखै। कार करै इत्तैर्द सांस चालै री विरती मिनंती तबकै री जीवण-डोर हुवै। मदन सैनी इण कथ्य नै 'सौराई' कहाणी में ठीक भांत परोट्यो है। कहाणी 'खेल' मदन सैनी री बाल-मनगत नै समझ री तासीर तो चौड़े करै ई करै पण विजयदान देथा बिज्जी री कहाणी 'अलेखू हिटलर' नै चेतै ई करावै जठै अेक साइकिल अर ट्रेक्टर री दौड़ हुवै। ट्रेक्टर रै कद पोसावै कै साईकिल वीं सूं आगै जावै, बियां ई 'खेल' में मोटै खिलाड़ियां रै कद पोसावै कै वांरी हेली सूं ऊचै गरीब रो दरखत सफेदो हुवै।

मदन सैनी री इण पोथी री कहाणियां में कमी है कै वै भाजै भोत तावळी है। अेक कहाणी में दोय-दोय पीढ़ी भाजती दीखै अर चाणचकै कहाणी ई मुकती दीखै। रचनाकर छोटी-सी घटणा नै कहाणी बणावण ढूकै, पण वा कोरौ आदर्स बणनै रैय जावै। कहाणीकार आदर्स री थरपणा में हेताळू नै इलाज बगत पीसां सारू नटाय देवै अर हेजाळू पूठो घरबासो करती दीखै। अेक सजोरै रचनाकार नै इण विरती सूं बचणो चाईजै। कहाणी ठीमरपणै रो काम है, वो मदन सैनी जैड़े कहाणीकार; जिको बीस बरस पछै कहाणी-संग्रै लेयनै आवै, कर सकै। औ करणो ई चाईजै। करीजैलो तद ई राजस्थानी कहाणी और सबळी हुवैला। ‘आस-औलाद’ रै इण रचाव में ल्हुक्या आगलै रचाव रा औनाणां में इण जातरा नै देखीजण री निजू मांग है।

नवी पोथी रो स्वागत है।



पोथी : आस-औलाद

विधा : कहाणी

कहाणीकार : मदन सैनी

संस्करण : 2023

प्रकाशक : ज्योति पब्लिकेशन, बीकानेर

पाना : 96

मोल : 250 रुपिया

